

# *NZAMBI KE SOBAKA*

## *DIBANZA YA YANDI SAMU*

### *NA NDIINGA YA YANDI?*



Beto kulumusa bayintu ya beto. Mfumumu ya luzolo Yesu, beto me vukana diaka na Nkumbu ya Nge, na kuingila ya nene samu na kumwangana ya Ngolo ya nkindusulu ya Nzambi samu na kunata beto na kuzaba kisika beto kele mpe kisika ya beto, mpe biyeka ya beto, mutindu bantu yina ba me bokila, yina me kabwana na yinza, ya kupesama na Nzambi. Pesa, Mfumumu, na nkokila yayi, ti balusakumunu ya Nzambi kutwadisa beto mpe kusungika beto na bima yina beto ke sala to ke tuba, ti yawu lenda pesa lukumu mpe nkembo na Nkumbu ya Nge. Amen.

<sup>2</sup> Mu ke na kiese na kuvutuka na yinzo-Nzambi na nkokila yayi mpe kuvwanda na beno bankundi ya luzolo. Mpe mu zaba ti mwini kele ngolo, kasi mu me bokila kento ya munu, Mu banza ti ya kele na ba-degré makumi tatu na zole to makumi tatu na samanu to kima mosi, mpe mwini kele ngolo mingi kulutila awa. Na yina mu me banda ntangu yayi na kumesana na mwini. Na yina, kasi mu ke na kiese mingi na kuvwanda awa na tabernacle na ntangu yayi ya Paki ya kitoko.

<sup>3</sup> Mpe mu lenda tuba ve ti mu ke lomba pardo samu na Nsangu yayi ya yinda, ya yinda ya suka yayi, kasi mu. . . Ya vwandaka, mu zolaka ve—zolaka ve kubebisa mvibudulu ya beno mpe na manima kumeka yawu diaka na nkokila yayi. Kasi mu—mu zolaka ku—kupesa beno Nsangu yayi, ti beno kele kitini ya mvumbukulu yayi. Beno me mona? Mpe beno vwanda dyaka ve, na boma ya Yawu, beno me mona. Beno yangalala samu na Yawu! Ya kele ve na kima mosi, kisika mosi ve, lendaka kabula beno na Yawu; kima mosi ve; beno kele na lukengolo Kukonda nsuka kati na Kimfumumu ya Nzambi. Ntangu Nzambi me tula Kidimbu ya Yandi na zulu ya beno, beno kele tii kuna beno ke kuma na nsuka ya nzietolo.

<sup>4</sup> Ntangu luyalu ke tula kidimbu na zulu ya kifunda mosi, ti banzila ya kisengo kutula kidimbu na zulu ya kielo mosi, ba lendaka ve kusimba wagon yina kana ya me kuma ve na nsuka ya nzietolo.

Ntangu Nzambi me tula Kidimbu ya Yandi na zulu ya muntu, mpe Kidimbu kele Mpeve-Santu, ntangu Yandi ke tula kidimbu na muntu mutindu yina, yandi kele na nzila samu na nzietolo ya yandi ya Kukonda nsuka. Ata fioti ve yandi lendaka vutuka

na manima, ata fioti ve. Samu beno bambuka moyo, Éphésiens 4:30 ke tuba, “Benoni niongisa ve Mpeve-Santu ya Nzambi, na yina beno me kuzwa kidimbu samu na bantangu nionso.” Benoni me mona, ba me tula beno kidimbu kukonda nsuka. Benoni kele ya kutula kidimbu, Kukonda nsuka, na kati ya Kimfumu ya Nzambi, na nzila ya Mpeve-Santu. Ntangu yayi beno banza na yawu!

<sup>5</sup> Na yina, beno, diabulu ke bula beno, mpe ke tuba na beno mambu nionso, mpe ke fundi beno, mpe—mpe kumeka na kusala ti beno banza ti beno kele ve mutindu yina. Kasi beno kuwa yandi ve.

<sup>6</sup> Ntangu yayi, beno zaba ti beno me luta lufwa na Luzingu. Benoni zaba mambu yina beno vwandaka zola, beno ke zolaka yawu diaka ve. Benoni zaba ti beno me kwikila konso Ndinga ya Nzambi. Benoni me mona Nzambi ke sala na kati ya beto, kukondwa . . . Bidimbu yina ke kubwaka ve ti Yandi kele “MU KELE” ya nene. Benoni me bakula ti yina ba tubaka na Nkumbu ya Yandi, ata kima mosi ve pesamaka na profesi na Nkumbu ya Yandi kasi yina salamaka kieleka mutindu ba tubaka yawu. Ata ti science, zulunale, bafoto, ba-camera, misoniki, bima nionso yankaka, fwana kuzaba yawu. Benoni me mona, ata ti bawu zola to ve, Nzambi ke salaka ti bawu kusala yawu, na mutindu nyonso, benoni me mona, samu na kulakisa yawu.

<sup>7</sup> Ntangu yayi, ya kele mwa kimvuka mosi ya fioti. Benoni bambuka moyo, ya kele ve kimvuka ya nene yina Yandi ke kwisa kusosa. “Benoni vwanda na boma ve, mwa nkonga ya fioti ya mameme; Tata ya benoni me tala mbote. . . .” Benoni me mona?

<sup>8</sup> Mu ke zola kuzabisa benoni kima mosi, yina ke yitukisa benoni, kaka ntete beto luta na lubyalusu ya mulongi. Mpe ya kele kima mosi ke yitukisa mingi, kasi samu kaka benoni zaba yawu. Ntangu yayi, mu ke tuba ve ti yayi kele ntalu ya kieleka, kasi mu ke zola kuzabisa yawu na benoni.

<sup>9</sup> Mu zaba ve kana ya kele na bantu awa yina me monaka ntete ve kuvukisa bankuna ya baniama. Na yina, mu ke kwikilaka yawu ve, kasi mu me monaka mutindu ba ke salaka yawu. Mpe mu me mona ba ke baka sperme ya niama ya bakala, na kitezo ya mingi, yina lendaka simba na zulu ya mwa kisalulu mosi ya kisengo, mutindu mwa cure-dent, mpe kutulula yawu na zulu ya mwa kitini mosi ya marbre. Mpe ba ke tula yawu na loupe mosi ke vimbisaka yawu, mu zaba ve bambala yikwa, tii kuna sperme yina . . . Kisika benoni lendaka mona kima mosi ve na meso ya benoni, to loupe yayi ya mumesanu. Kasi ntangu ya ke vimba, bambala nkama mosi to nkama mosi makumi tanu na tanu, benoni lendaka mona na kati ya mwa ditono yina, ya sperme, mu banza makumi tanu na nkama mosi ya mwa bankuna yina ke dumuka kuna. Mpe, kento mpe basisaka bamaki mingi, na—na kati ya

sperme. Ntangu yayi, ntangu ba ke—ke vukisa bawu, ntangu yayi, zole ya ntete yina ke kutana mpe ke vukana . . .

<sup>10</sup> Ya kele kaka na mosi na kati ya mafuku yina ke zinga. Beno me banzaka ntete na yawu? Bawu kele ya nkuna mosi, mpe ya diki mosi, bawu zole kele mutindu mosi, kasi mosi kaka ke zinga. Mpe ya ke kipe ve yina ke kuma kuna ya ntete. Samu, na ntangu yankaka diki, kele kuna na manima, mpe diki lendaka vwanda na kati-kati ya sperme, mpe ba ke mata na zulu ya mosi na yankaka. Ya ke lomba Mayele na kuzaba kana ya ke vwanda mwana-bakala to mwana-kento, bansuki ya mbwaki, bansuki ya ndombe, to nionso yina. Ya kele nsodolo ya Nzambi. Ya lenda vwanda kima yankaka ve. Nsodolo!

<sup>11</sup> Mpe na lubutuku ya kimuntu, kele kusoola, kana yawu ke vwanda mwana-bakala to mwana-kento, to konso kima yina yawu ke vwanda. Mpe ntangu mwa nkuna yina ya fioti ke kota na diki yayi na kuninganaka, mpe mwa mikila ya fioti ke zengana, ya ke banda na kusala mukwa ya bébé na mutindu ya yawu; niama, bébé, to nionso yina ya kele. Mpe mafuku ya bamaki yankaka yina . . . Difuku mosi ya bamaki, difuku mosi ya bankuna, mpe mosi kaka ke zinga. Bawu nionso mutindu, kasi Nzambi ke soola yina ke zinga na nzila ya kusoola, mpe bayankaka ya bawu ke kufwa. Mosi na kati ya difuku mosi!

<sup>12</sup> Ntangu Israel bikaka Egypte, bawu nionso kwikilaka nsangu ya profete mosi. Bawu monaka bidimbu ya Nzambi, na nzila ya Moise. Bawu nionso monaka yawu. Mpe bawu nionso basikaka na Egypte, mpe bawu zabukaka Mubu ya Mbwaki, mpe ba botamaka na Moïse. Bawu nionso monaka ngolo ya Nzambi kusimba yandi, ntangu yandi vwandaka yimbila na Mpeve; mpe ntangu Myriam bulaka tambourin, vwandaka kima mbangu na lweka ya kumu. Mosi na mosi ya bawu, na bankokila nionso, vwandaka kudia mana ya malu-malu ya mazulu, yina katukaka na mazulu. Bawu nionso kunwaka na Ditadi ya kimpeve yina ba bulaka. Mpe ya vwandaka na mafuku zole ya bantu yina bikanaka ya Egypte. Bantu yikwa kotaka na yinsi ya nsilulu? Zole. Mosi na kati ya fuku mosi! Wapi bawu nionso? Yesu tubaka ti bawu kufwaka. “Batata ya beno kudiaka mana na ntoto ya kuyuma, samu na kitini ya bamvula makumi tatu, mpe mu ke tuba na beno ti bawu nionso me kufwaka.”

<sup>13</sup> Ntangu yayi ya kele pene ya bankama tanu ya mafuku ya Baklisto na yinza na nkokila yayi, na kutanga ba-Katolika, ba-Protestant, mpe nyonso. Kana Yesu lendaka kwisa na Enlevement yina, landila yina mu me tuba, ya ke vwanda na bantu bankama tanu ke kondwa na yinza na nkokila yayi, na Enlevement. Mpe ya ke vwanda kaka ntalu yina konso kilumbu, kana beto ke tanga na bayinsi nionso, ya ke monana ata fioti ve. Na yina ya ke vwanda na konso ntangu yina, beno me mona.

14 Oh, Baklisto, beto lwata kinwaninu ya Nzambi. Beto sala nionso beto lendaka sala, samu na kusadila Yandi, kuzola Yandi, mpe beto vingila ntangu yina ya nene.

15 Ntangu yayi, ya ke vwanda ve na mafuku ya nene mpe bantu mingi yina ke basika na nsungi mosi mpe yina ke kota. Ya lenda—ya lenda salama ve.

Ntangu yayi, beno bambuka moyo, konso kilumbu ke sukisaka nsungi mosi, konso kilumbu. “Mutindu ya vwandaka na bilumbu ya Noé, mutindu mosi ya ke vwanda na nkwizulu ya Mwana ya muntu, kisika mioyo nana vulukaka na masa.” Kasi konso kilumbu ke sukisaka nsungi ya mvula makumi yiya samu na muntu mosi, samu na bantu yankaka. Beno me mona? Mpe konso kilumbu, bantu mingi ke baka kidimbu mpe ba ke tula bawu na lweka na kati ya Kimfumu. Kilumbu mosi, kilumbu ya nsuka ke kwisa.

Beto vwanda ya kusungama ntangu yayi, na yina beto kele na mabanza ya beto ya kieleka. Mpe na kati ya dibuundu, mpe na kati-kati ya bantu, kisika Mpeve-Santu me kukitalisa Yandi mosi na beto, beto vwanda ya kusungama ti bima nionso kele ya kusungama, mpe beno bikana ya kusungama, na ntwala ya Yandi.

16 Beno kusutope ve. Beno pema ve, na kilumbu mpe na mpimpa, tii kuna Ngolo yina ya nkindusulu me basisa beno na kati ya bima ya yinza, samu na kukotisa beno na Kimfumu ya Nzambi. Mpe beno yina me kota kieleka na kati ya Kimfumu ya Nzambi mpe kindisama na nzila ya Mpeve ya Nzambi, wapi kiese yayi! Na masa ya meso ya kiese ti beto lendaka fukama, mwini mpe mpimpa, kutonda Nzambi samu na yina Yandi me sala.

17 Na nkokila yayi beto ke soba fioti kisalu. Beto kele na mpangi mosi ya mbote awa, Mpangi Capps. Yandi me katukila beto na dibuundu ya ba-Nazaréen. Mpe mu banza ti ya kele kieleka, Mpangi Capps? Yandi ke zola kuzwa lubyalusu na beto na nkokila yayi, na kutentikaka maboko.

18 Beto kele ve na mikanda ya kupesa na muntu, kasi beto me zaba ti mutindu. . . Beto lenda vwanda na mikanda, kasi beto ke kwikila ti longi ya kieleka, yina ba me byadisa, mikanda ya yandi kele na Mazulu. Beno me mona? Mpe yandi—yandi ke na muswa ya kulonga Biblia ntangu nionso Nzambi ke talisa luzingu ya yandi na Biblia. Beto ke kwikila ti yina kele mikanda ya yandi.

19 Mpe, ntangu yayi, Mpangi Capps kuzwaka lubyalusu na dibuundu ya ba-Nazaréen na ntwala ya bantu, kasi na nkokila yayi yandi ke zola bakuluntu, mpe nionso yina, kutentika maboko na zulu ya yandi samu na lubyalusu, samu na kulonga Nsangu yayi. Kima ya mfunu mingi!

20 Ba me—me zabisa munu mambu kubanda mu vwandaka na Tucson, mpe mambu ya kulutula kitoko, samu na lusalusu ya Mpangi Capps awa ke pesaka na Mpangi ya beto ya luzolo

Neville, na yina ba ke simba Nsemo yayi na kikesa nionso mutindu bantu yayi zole lendaka kusala. Beto me tentikaka maboko na zulu ya Mpangi Neville, kasi na zulu ya Mpangi Capps ve. Mpe mu zola bayina kele balongi, Mpangi Jackson mpe bayankaka, kana bawu kele awa, mpe Mpangi Ruddell mpe bakuluntu ya dibuundu awa, kana bawu ke kwisa awa na mwa ntangu fioti, mpe ba ke tula maboko na zulu ya Mpangi Capps. Mpe . . .

<sup>21</sup> Ntangu yayi beto ke mona, na kati ya Biblia, ti ya kele mutindu yina ba vwandaka sala yawu, ba vwandaka tentika maboko na zulu ya bawu mpe ba vwandaka tula bawu na lweka kuna. Mpe ya kele mutindu yina bawu salaka na Timothée. Yandi tubaka, “Na nzila ya dikabu yayi kele na kati ya nge, katuka nkooko ya kento Loïs . . .” Ba zabaka yawu, ti ya vwandaka na dikabu na kati ya bakala yayi, yina kwisaka na yandi na nzila ya bakuluntu, na kutentikaka maboko.

<sup>22</sup> Ntangu yayi, kasi, bampangi ya bilumbu ya nsuka, bampangi ya mvula ya nsuka, bawu, bawu me vwalangisa yawu. Bawu banzaka ti bawu pesaka yandi dikabu, na kusalaka yawu. Ve, dikabu vwandaka dezia na kati ya yandi, mpe bawu tulaka maboko ya bawu na zulu ya yandi mutindu kundimama ti bawu vwandaka kwikila ti Nzambi tulaka ntete dikabu na kati ya yandi. Mpe bawu ndimaka yawu, na nzila ya kutentika maboko.

<sup>23</sup> Mpe babakala yayi awa na kati ya yinzo-Nzambi, yina mu ke kwikilaka ti bawu kele na Ngolo ya Yandi ya nkindusulu na kati ya moyo ya bawu; kana beno bampangi-babakala ke kwisa kaka na ntangu yayi, Mpangi Ruddell mpe bayankaka nionso kele awa na yinzo-Nzambi, mpe bakuluntu mpe mabuundu ya bampangi na nziunga, samu na kutentika maboko na zulu ya Mpangi Capps, ti ba byadisa yandi na kidimbu ya beto, na ntwala ya bantu, mpe ke fidisa yandi samu na kulonga Nsangu ya mbote ya Mfumu Yesu, konso kisika yina Nzambi ke bokila yandi. Yandi me kuma . . .

Yandi kele dezia mosi ya beto, na nzila ya Lubutuku. Yandi kele mosi ya beto samu yandi me kwikila Nsangu. Yandi kele mosi ya beto samu ti—ti yandi ke telamaka samu na Kieleka ya Ndinga. Mpe beto ke zola kubyadisa na ntwala ya bantu Mpangi Capps, na ntwala ya beno, na kutentika maboko, ti yandi kele mosi ya beto.

Ok, Mpangi Ruddell, Mpangi Capps, Mpangi Neville. Mpangi Junior Jackson, mosi na kati ya milongi yankaka yina kele awa, mu zaba ve lutangu ya bantu yina kele. Mu kele ve . . . Mu banza ti bawu ke na balukutakanu ya bawu mosi na nkokila yayi. Na yina kwisa awa, Mpangi Capps.

Ntangu yayi wapi Mpangi Hunter mpe bayina me katuka na New York, munu . . . Mpangi Anthony? Mu banza ti bawu me

vutuka. [Mpangi Neville me tuba, “Mpangi Anthony kele kuna na manima.”—Mu.]

Mosi na kati ya beno yankaka yina kele awa, bayina kele na beto, na yina, beto ke vwanda na kiese samu na beno na kukwisa awa mpe kutelama na beto ntangu yayi, na mutindu beto ke kwikila ti Mpangi Capps ke vwanda. . .

Bantu yikwa na kati ya beno awa zaba Mpangi Capps? Beno telemisa diboko ya beno. Mbote mingi, beno kulumusa diboko ya beno. Bantu yikwa ke kwikila ti yandi kele kisadi ya Nzambi? Beno telemisa maboko ya beno. Beto ke zolaka yandi, mutindu mpangi ya beto ya bakala.

<sup>24</sup> Ntangu yayi yayi kele ve kieleka mutindu ya kulunga na yina beto ke bokila lubyalusu, kasi mu ke zola ti bantu yayi, mu lendaka yimbila nkunga yayi, kasi mu ke zola beno sadisa munu na kumeka yawu.

<sup>25</sup> Kilumbu mosi profete kwendaka na autel, na kati ya tempelo. Mpe na ntangu yandi vwandaka kuna na tempelo. . . Yandi vwandaka muntu ya mbote, kasi yandi vwandaka sepela kaka kuyekama na maboko ya ntinu Osias, mpe yandi vwandaka—yandi vwandaka muntu ya mbote. Kasi, kilumbu mosi, na tempelo, yandi monaka kima mosi, ntangu yandi kuzwaka vision mosi, yina yandi vwandaka me monaka ntete ve. Yandi monaka Bawanzio, na mapapu, ke pumbuka na ntwala mpe na manima, na kati ya kivinga, ba vwandaka boka, “Santu, santu, santu, Mfumu Nzambi ya Ngolo nyonso!” (Kwisa, mpangi-bakala. Yinga. Beno me mona?) “Santu, santu, santu, Mfumu Nzambi ya Ngolo nyonso!” (Ben.)

<sup>26</sup> Mpe ntangu yandi salaka yawu, makunzi ya tempelo kuninganaka. Mpe yandi tubaka, “Kyadi na munu! samu ti mu kele muntu ya bikoba ya masumu.” Na Mvwandulu ya Nzambi yandi zabaka, ti ata mpe yandi vwandaka profete, yandi vwandaka na yimbi. Yandi tubaka, “Mu kele muntu ya bikoba ya mvindu, mpe mu ke zingaka na kati-kati ya bantu na bikoba ya masumu.”

<sup>27</sup> Mpe mosi ya Bawanzio pumbukaka, mpe bakaka makala ya Tiya mpe simbaka bikoba ya yandi, mpe tubaka, “Pesa profesi, mwana ya muntu!”

Nge zola kupesa beto note na yawu, mpangi-kento, kana nge zola. Bantu yikwa me zaba nkunga yayi? Beto baka, nzila mosi. Mbote mingi.

Ntangu makala ya Tiya simbaka profete,  
Kumisaka yandi ya kuvedila na mutindu ya  
lendaka vwanda,  
Ntangu Ndinga ya Nzambi tubaka, “Nani ke  
kwenda samu na beto?”  
Na yina yandi vutulaka mvutu, “Munu yayi,  
fidisa munu.”

[Kisika ya mpamba na bande—Mu]. . . tuba,  
 Mfumu ya munu,  
 Tuba, mpe mu ke vutula mvutu na nswalu na  
 Nge;  
 Tuba, Mfumu ya munu, tuba, Mfumu ya munu,  
 Tuba, mpe mu ke pesa mvutu, “Mfumu, fidisa  
 munu.”

Mafuku kele na kufwa ntangu yayi na disumu  
 mpe nsoni,  
 Kuwa kudila ya bawu mpe kuboka ya bawu ya  
 mawa;  
 Sala nswalu, mpangi-bakala, kwenda nswalu  
 na lusalusu ya bawu;  
 Na nswalu pesa mvutu, “Mulongi, munu yayi.”  
 Tuba, Mfumu ya munu, tuba, Mfumu ya munu,  
 Tuba, mpe mu ke vwanda na nswalu samu na  
 kuvutula mvutu na Nge;  
 Tuba, Mfumu ya munu, tuba, Mfumu ya munu,  
 Tuba, mpe mu ke vutula mvutu, “Mfumu,  
 fidisa munu.”

Bika ti bakuluntu kukwisa ntangu yayi samu na kutentika maboko na zulu ya Mpangi Capps. Beto nionso kukulumusa bayintu ya beto.

<sup>28</sup> Nzambi ya luzolo, makunzi ya tempelo me ningana diaka, mpe mutindu Mpeve ya Luzingu ya nkindusulu ke na kusalaka na kati ya mpangi ya beto ya bakala. Mu ke sambila, Nzambi, na yina yandi ke kuwa yayi na Zulu, yina ke tuba ti yandi fwana kwenda. Beto ke tentika maboko na zulu ya yandi, mutindu bakuluntu ya Nge, Mfumu, mpe kupesa yandi diboko ya kimpangi; mpe beto ke tentika maboko ya beto na zulu ya yandi, mpe ke lutisa masakumunu ya Nzambi na zulu ya yandi, ti Nge ke pakula bikoba ya yandi, mabanza ya yandi nyonso, bumuntu ya yandi nionso. Mpe bika yandi nata Nsangu yayi ya Nsangu ya mbote na bansongi nionso mpe bisika nionso yina Nge ke bokila yandi. Pesa yawu, Mfumu. Beto ke pesa Nge mpangi ya beto ya bakala, mutindu kisadi ya Nge, na Nkumbu ya Yesu Klisto. Amen.

<sup>29</sup> “Longa Ndinga,” mpangi ya munu ya ntwenia. “Na ntangu nionso, ya mbote to ve; sungika, semba, na ntima ya yinda mpe na Malongi.” Nzambi sakumuna nge, mpangi-bakala.

<sup>30</sup> [Mpangi Ben Bryant me tuba, “Mpangi Branham, nge lenda tentika maboko na zulu ya munu? Bawu lendaka tentika maboko na zulu ya munu? Mu ke zola kuvwanda ya kubyadisa.”—Mu.] Nge. . . ? Mu zabaka ve ti nge vwandaka ve ya kubyadisa.

Mpangi Ben, awa, me kwisa na beto. Mu banza ti yandi vwandaka longa na mwa ntangu mosi. Kasi, yandi vwandaka na ntuala ya bantu ve (mu banzaka ti yandi vwandaka ya

kubyadisa; ya kele samu na yina mu me bokila yandi.) na meso ya bantu, to ba me tentikaka yandi ntete maboko ve awa.

<sup>31</sup> Ntangu yayi, kento ya Mpangi Ben kele awa kisika mosi kuna, mpe yandi ke muntu mosi ya luzolo. Yandi vwandaka mulongi ya kento. Mpe ntangu yandi na mpangi ya beto ya bakala vwandaka me kwelana, mpe yandi nataka yandi na tabernacle, ntangu yandi monaka mpe kuwaka Ndinga, yandi vwandaka mwa kento mosi ya lutondo na bumuntu ya mbote, kasi ntangu yandi monaka ti ya vwandaka yimbi samu na bakento na kusala mutindu yina, yandi me tula yawu na lweka; mpe ya monanaka ti yawu kulumukaka na zulu ya bakala ya yandi. Ya kele mbote. Ya kele mutindu ya bantumwa. Ya lendaka vwanda mutindu yina.

<sup>32</sup> Mpangi Ben ke bakaka ba-bande, mutindu mu me bakula, na kento ya yandi. Ba ke kwendaka na bisika ya nta- . . .kuna na bisika ya ntama, ntama kuna na kati ya myongo, na kati ya bamfinda, mpe ba ke bula ba-bande yayi mpe ke samuna na zulu ya ba-bande. Na bambala mingi ba ke benganaka bawu, ke basisa bawu, ba ke basisa bawu na nganda. Beto ke vingilaka yawu. “Samu bantu yina nionso ke zingaka na busantu kati na Klisto Yesu bawu ke mona mpasi mingi.”

<sup>33</sup> Bantu yikwa awa me zaba Mpangi Ben? Bantu yikwa ke kwikila ti yandi kele kisadi ya Nzambi, ya kulunga samu na lusakumunu yayi beto ke lomba na Nzambi samu na yandi? Beno me mona, yandi kele nzenza ve. Yandi vwandaka na beto bamvula mpe bamvula. Mu zaba yandi mutindu muntu ya kukikulumusasa. Yandi ke zolaka munu; yandi ke salaka bifu mingi. Beto nionso ke salaka yawu. Yina mu ke zolaka samu na Mpangi Ben, yandi kele ya kukubama na kukubama samu na kusungika bifu ya yandi.

Mpe ntangu yandi kuwaka, kilumbu yina, na zulu ya *Makwela Mpe Kufwa Makwela*, yandi mpe kento ya yandi vwandaka ya kukubama samu na kukabwana, samu ti yandi ke zolaka yandi, mpe kento ya yandi ke zolaka yandi, kasi bawu zola kuvwanda ya kusungama na Ndinga ya Nzambi. Nionso yina Ndinga me tuba, yawu yina bawu ke zolaka. Mu ke sambila ti Nzambi sakumuna Ben mpe kento ya yandi, samu na kisalu ya Yandi.

Beto tentika maboko ya beto na zulu ya mpangi ya beto ya bakala.

<sup>34</sup> Nzambi ya luzolo, beto ke tentika maboko ya beto na zulu ya Mpangi Ben, na kidimbu ti beto zola yandi. Mpe beto ke kwikila, Mfumu, ti yandi zola sala kisalu samu na Nge, samu ti ba fidisa yandi na ba-bande yayi, samu na kubula yawu na kati-kati ya bantu ya bamongo na bisika ya ntama kuna kaka mingi na kati ya beto lendaka kwenda ata fioti ve, kasi ntete Nsangu fwana kwenda na yinza ya muvimba. Beto ke sambila



ti Nge sakumuna mpangi ya beto ya bakala, mpe pesa yandi Mpeve ya Nge, mpe bika ti Yawu kwisa na zulu ya yandi. Mpe twadisa yandi, mpe sungika yandi mpe kento ya yandi na bisika yina kisika ntangu yankaka moyo yina kuna, mpe bielo lendaka ve kukangama kana dimeme yina me kota ve. Makumi yivwa na yivwa me lunga ve samu na Nge. Nkumbu nionso yina kele na Buku fwana kukota. Sadisa bawu, Mfumu, mutindu beto ke tentika maboko ya yandi na zulu ya yandi, samu na kuvukana na yandi mutindu mpangi ya beto ya bakala. Mpe lusalusu ya beto mpe bisambu samu na yandi, ke kwenda na yandi. Mpe beto ke sambila ti Nge sakumuna yandi, Mfumu, konso kisika yina yandi ke kwenda. Na Nkumbu ya Yesu. Amen.

Nzambi sakumuna nge, Mpangi Ben! Diboko ya kimpangi beto ke pesa nge, mutindu bampangi ya balongi. Nzambi sakumuna nge, mpangi-bakala.

<sup>35</sup> [Mpangi Earl Martin me tuba, “Mpangi Branham, nge lenda tentika maboko na zulu ya munu, kubyadisa munu mutindu pasteur?”—Mu.] John Martin . . . [“Earl.”] Earl.

Bantu yikwa zaba Earl Martin? Bantu yikwa ke kwikila ti yandi kele kisadi ya Klisto? Yandi me katukila beto na . . . Mu ke kwikila, na kisina, na kimvuka ya ba-Pentecotiste, mpe ntangu yayi mu banza ti yandi kele pasteur mpe ke salaka kisalu yandi mosi.

<sup>36</sup> Mu zaba ti Earl kele kisadi ya kieleka ya Klisto. Mu ke zimbana ata fioti ve kima mosi, ya kele mingi, kasi kima mosi salaka Earl. Mu ke bambuka moyo na nkokila mosi ba bokilaka yandi ntangu mu vwandaka na Dallas, na Texas; to mu—mu banza, ve, ya vwandaka . . . [Mpangi-kento me tuba, “Beaumont.”—Mu.] Na Beaumont, na Texas, ya kele kieleka, mpangi-kento. Mpe bawu—bawu . . . Bébé ya yandi vwandaka ya kulala, vwanda kufwa, mpe bawu vwandaka banza ti ya vwandaka yimeni me kufwa. Yandi vwandaka pema dyaka ve. Mpe Earl yilamaka samu na kukwisa na kivinga ya munu, mutindu tata, mapeka ya kufumbama, yandi fukamaka pene-pene ya munu, mutindu mu vwandaka na mbeto. Yandi balukaka samu na kubasika na mbeto; yandi tulaka maboko ya yandi pene-pene ya munu mpe tubaka, “Mpangi-bakala, mu ke kwikila ti nge kele profete ya Nzambi. Mu ke kwikilaka yawu ntangu nionso. Mpe kana nge lenda tuba kaka ndinga mosi, ata ti bébé ya munu me kufwa, yandi ke zinga.” Mpe bébé ya yandi vutukaka na luzingu, yandi ke zinga.

<sup>37</sup> Beno ke kwikila ti yandi kele ya kulunga samu na diboko ya kimpangi na mikwikidi yayi? [Dibuundu me tuba, “Amen.”—Mu.]

Beto sambila, bampangi ya babakala, mutindu beto ke tentika maboko na zulu ya yandi.

<sup>38</sup> Tata ya Mazulu yina me fuluka na lemvo, beto ke tentika diaka maboko, na zulu ya Mpangi ya beto Martin. Beto ke fidisa yandi, Mfumu, na bisika ya ntama mingi ti Nge me tuma ti yandi ke kwenda; konso kisika yina ya kele, mingi to fioti, na banzila ya kubaluka, na babala-bala, na balweka ya mapangu, konso kisika yina. Nionso yina ya kele, Mfumu, bika balusakumunu ya Nge kuvwanda na yandi. Beto ke tentika maboko ya beto na zulu ya yandi mutindu ke tuba na yandi kusalu ya mbote samu na Nge mpe beto ke pesa yandi balusakumunu ya beto, ti Mpeve yina kele na zulu ya beto, Mfumu, kukwenda na yandi, mpe ke twadisa yandi mpe sungika yandi na mioyo yina me zimbana na balweka ya lupangu mpe babala-bala ya nene. Beto ke fidisa yandi, na Nkumbu ya Yesu Klisto. Amen.

Nzambi sakumuna nge, Mpangi Martin. Kwenda ntangu yayi, mpe Mfumu kuvwanda na nge.

<sup>39</sup> Samu na lukanu mosi? [Mpangi Richard Blair me tuba na Mpangi Branham—Mu.] Richard kele nkumbu ya nge? [“Kieleka. Richard Blair.”] Bantu yikwa zaba Richard Blair? Bantu yikwa ke kwikila ti yandi kele kisadi ya Nzambi? Yandi me katuka na kimvuka ya dibuundu ya ba-Pentecotiste Unis.

Mpe mpangi-bakala, Mpangi Blair, mu ke bambuka moyo na lubokilu ya yandi, ya nene. Mu ke bambuka moyo ntangu yina Mpangi Blair vwandaka ve, vwandaka zola ve kukwikila munu, samu ya vwanda na mpeve mosi vwandaka sala na yandi, yina vwandaka tuba na yandi ti mu vwandaka na kifu. Mpe na yina yandi vwandaka ya kuvwanda na kati ya lukutakanu, Mpeve-Santu kwisaka kuna mpe zabisaka yawu. Mpe yandi zolaka kubwa ngambu, mpe yawu yina salaka yandi mutindu yina.

Mpe mu ke bambuka moyo ti kento ya yandi ya luzolo bokilaka munu kilumbu mosi. Yandi tubaka, “Mpangi Branham, mu banza ti Richard ke kufwa.” Mpe yandi vwandaka, mu banza, na kitambala mosi. Yandi kwendaka mpe tululaka yawu na zulu ya yandi, mutindu mu tubaka na yandi, mpe sambilaka. Yandi yayi awa.

<sup>40</sup> Mwa bébé yina kuzwaka kisumbula, to, [Mpangi Blair me tuba, “Mwana ya munu ya bakala.”—Mu.] mwana ya yandi ya bakala, na kisumbula, ba vwandaka pesa yandi ve kivuvu mingi ya kuzinga, yandi vwandaka na mpasi ya yintu. Mpe na bisambu, ata mpe na nzila ya allo-allo, bébé yina belukaka.

Beno ke kwikila ti Mpangi Blair kele mbingi ya kieleka ya Klisto? [Dibuundu me tuba, “Amen.”—Mu.] Beno ke sambila ti balusakumunu ya beno ke kwenda na yandi.

Bampangi, beno tentika maboko ya beno na zulu ya yandi.

<sup>41</sup> Nzambi ya luzolo, samu na kutalisa mpangi ya beto ya bakala ya mbote mpe ya lukumu, Kisadi ya nge, yina me katuka na kimvuka ya yandi mosi, samu na kutambula na Nsemo. Tata, beto ke sambila ti Nge ke sakumuna Mpangi ya beto ya bakala

Blair, mutindu beto ke fidisa yandi na balusakumunu ya beto mpe kidimbu ya beto, na kutentikaka maboko ya beto na zulu ya yandi, na konso kisika yina Nge ke bokila yandi, Mfumu, na konso kisalu yina ya lenda vwanda. Bika ti Mpeve ya Nge kukwenda na Mpangi Blair. Twadisa yandi mpe sungika yandi na yinza yayi ya kuzimbana mpe yina ke kufwa, ti yandi lenda sadisa samu na kuzwa dimeme yina me zimbanaka, ti yandi lenda vutula yawu na lupangu. Konso kisika yina yawu lendaka vwanda, konso kima yina Nge kele na yawu samu na yandi, Mfumu, beto ke lomba kaka Mpeve ya Nge kutwadisa yandi mpe kusungika yandi na nzietolo ya luzingu ya yandi nionso. Beto kele bampangi ya yandi. Na kupesaka yandi diboko ya kimpangi, beto ke lomba Nge na kukwenda na yandi, na Nkumbu ya Yesu Klisto. Amen.

Diboko ya kimpangi! Nzambi sakumuna nge, Mpangi Blair. Beto kele na nge, nkama na zulu ya nkama, beto ke sambila samu na nge mpe ke sala nyonso yina beto lenda sala na kusadisa nge. Nzambi sakumuna nge.

<sup>42</sup> [Mpangi Merlin Anthon me tuba, “Ya kele mutindu mosi samu na munu, Mpangi Branham, samu na lubyalusu.”—Mu.] Yinki nge me tuba? [“Lubyalusu.”] Nani nge kele? [“Merlin Anthon.”] Merlin Anthon. [“Mu kele na kati ya yinzo-Nzambi.”] Wapi kisika? [“Awa na kati ya yinzo-Nzambi.”] Na kati ya yinzo-Nzambi. Muntu mosi kuzaba Mpangi Merlin Anthon? Yandi kele ya malu-malu, samu na munu. [“Na Armée du Salut. Nge bambuka moyo na munu?”] Oh, yinga. Lemvokila munu, mpangi-bakala.

Na Armée du Salut, yina kele kieleka, mu me bambuka moyo na yandi. Ya kieleka, mu me zaba yandi ntangu yayi. Mu kele kaka . . . Mu vwandaka me zimbana kizizi ya yandi kaka kuna, na ntangu yayi. Bantu yikwa zaba ti yandi kele muntu ya Nzambi? [Dibuundu me tuba, “Amen.”—Mu.] Bantu yikwa ke kwikila ti—ti Nzambi ke salaka na yandi? Beno telemisa diboko ya beno. [“Amen.”] Beno ke sambila samu na yandi? [“Amen.”]

<sup>43</sup> Ntangu yayi, mpangi-bakala, beto zaba ti nge me katuka na kimvuka ya nene ya bantu, Armée du Salut, bawu kele bantu ya nene. Kasi, mpe, kasi Armée du Salut ke salaka kisalu ya nene na bala-bala. Beto lendaka tuba kima mosi ve samu na ba-Nazaréen, dibuundu ya ba-Pentecotiste, to Armée du Salut, to mosi na kati ya yawu; ba kele bampangi ya beto. Kasi, beno me mona, beto ke kwikila ti beto kele minati ya Nsangu ya nene samu na ngunga yayi beto ke na kuzinga. Nge zola kusala yawu na beto? [Mpangi Anthon me tuba, “Amen.”—Mu.]

Beto kulumusa bayintu ya beto na ntangu beto ke tentika maboko ya beto na zulu ya mpangi ya beto ya bakala.

<sup>44</sup> Tata ya Mazulu ya luzolo, Nge kele Yandi yina ke bokilaka. Nge kele Mosi yina ke pesaka luzingu na Ndinga, samu ti bawu

kwikila. Mpe beto ke tentika maboko ya beto na zulu ya mpangi ya beto ya ntalu, mutindu kidimbu ti beto ke kwikila ti Nge kele na yandi mpe ke sadisa yandi. Beto ke fidisa balusakumunu ya beto na yandi, samu na kutalisa ti beto ke kwikila ti beto me luta lufwa na Luzingu mpe ntangu yayi beto ke tula Ngolo ya nkindusulu na kati ya bantima ya beto, na lemvo ya Nzambi, beto ke tentika maboko na zulu ya mpangi ya beto ya bakala mpe beto ke fidisa yandi na balusakumunu ya beto, ti Nge ke twadisa yandi mpe ke sungika yandi na konso kitini ya ntoto, Mfumu, ti Nge me tuma yandi na kukwenda. Bika ti Mpeve ya Nge kukwenda na yandi mpe kupesa yandi mavimpi, ngolo, mpe lunungu na ministere ya yandi, samu beto ke fidisa yandi na Nkumbu ya Yesu Klisto. Amen.

<sup>45</sup> Nzambi sakumuna nge, mpangi-bakala. Ya kele diboko ya kimpangi, beno zaba, bampangi ya babakala kupesa yandi mbote, bampangi mutindu yayi. Na yina beno kele. . . Mbote mingi, Mfumu sakumuna beno nyonso.

<sup>46</sup> [Mpangi Carrell me tuba, “Mu—mu me salaka ntete ve, na ntuala ya bantu. Nge zola tentika maboko ya nge na zulu ya munu, mutindu bayayi, na Nkumbu ya Yesu.”—Mu.] Nge, nionso yina nge me zola. Mpe ya nge. . . [“Ntangu yawu yayi ya kuvwanda mutindu yina, mpe samu na lukanu mosi na bawu.”] Ntangu yayi yinki kele nkumbu ya nge? [“Mpangi Carrell, yina me katuka na Cincinnati.”] Mpangi Carrell.

[Mpangi Carrell me tuba, “Mu vwandaka longi yina ba me byadisa, kasi mu vwandaka wisana ve na mpangi-bakala yina vwandaka byala bakento mutindu balongi, mpe ya lombaka ti mu kabwana na yandi.”—Mu.]

Yayi kele Mpangi Carrell ya Cincinnati. Muntu nionso yina zaba Mpangi Carrell, beno telemisa. . . Mutindu yandi kele ya Cincinnati, mu kele tula ntembe, ti muntu mosi kuzaba yandi. Yandi me tuba ti yandi vwandaka na kimvuka mosi, mpe kimvuka vwandaka zola kbyadisa balongi ya bakento. Yandi lendaka kanga ntima na yawu ve, mpe ya lombaka ti yandi kabwana na bawu.

Ya kele kaka mutindu mu kabwanaka na ba-Baptiste Missionaire. Docteur Roy E. Davis, bantu yikwa me kuwaka yandi? Ya kieleka, beno me kuwaka yandi, beno me mona. Yandi zolaka sala mwa milongi ya bakento, mpe mu tubaka, “Ve, tata. Mutindu kuluntu,” mu tubaka, “Mu lendaka ve kusala yawu, na ntima ya munu. Ya ke telemina Ndinga ya Nzambi.”

<sup>47</sup> Mu zaba nge ve, Mpangi Carrell. Kasi na zulu ya lufulu ya kimbangi ya nge, mpe Kieleka yayi ti nge ke simbisaka. . . Beto kele na kima mosi ve samu na bakento yina. Ba kele bampangi ya bakento. Beto ke zolaka bawu. Kasi beto ke kwikilaka ti ba kele na kisika ya bawu, mpe ti bawu fwana bikana kuna. Beno me mona? Mpe beto ke kwikila ti ba kele cherie samu na

bakala mosi, lusalusu. Ata mbala mosi ve . . . Beto ke banzaka ti bawu kele dikabu ya kulutila nene, na nganda ya mpulusu, yina Nzambi lendaka pesa na bakala. Kasi kisika ya yandi kele ve na chaire, landila Ndinga ya Nzambi. Na zulu ya lufulu yina, mpe lukwikilu ya nge na Nzambi, beto ke tentika maboko na zulu ya nge, mutindu kimpangi, na kukwiza na beto.

Beto tentika maboko ya beto na zulu ya yandi.

<sup>48</sup> Tata ya beto ya Mazulu ya luzolo! Ntwenya yayi ya bakala, mu lenda zaba kaka mutindu yandi ke kuwa. Yandi me basisa yandi na nganda samu na Kieleka ya kieleka. Ti, “Muntu ke zinga kaka ve na dimpa, kasi na Ndinga nionso.” Na yina beto ke tentika maboko na zulu ya yandi, beto ke tula balusakumunu ya beto na zulu ya yandi. Bika ti Mpeve ya Nge kutwadisa yandi, kutwadisa yandi, mpe kusungika yandi na nzietelo nionso ya luzingu na konso kisika yina Nge lenda fidisa yandi, Mfumu. Bika yandi zaba ti beto ke sambila samu na yandi, mpe ke vwanda lusalusu samu na yandi, mpe ke simbisa yandi ntangu nionso yandi ke kangama na Kieleka. Pesa yawu, Mfumu. Beto ke fidisa yandi, na Nkumbu ya Yesu Klisto. Amen.

Nzambi sakumuna nge, Mpangi Carrell.

Beno tentika kaka maboko ya beno, beno nionso. Beno nionso kupesa mutindu diboko ya kimpangi samu na yawu.

<sup>49</sup> Mpangi Ruddell, awa, me byalamaka ntete ve na ntwala ya bantu awa na yinzo-Nzambi. Lenda . . . Bantu yikwa zaba Mpangi Ruddell? [Dibuundu me tuba, “Amen.”—Mu.] Beto nionso me zaba yandi. Bantu yikwa zaba ti yandi kele muntu ya Nzambi? [“Amen.”]

Tata ya Mazulu ya luzolo, na mutindu bakuluntu ya Nge ke tentika maboko na zulu ya mpangi ya bakala yayi yina me zabuka bamasa ya mudindu, ya poto-poto. Yandi me mona dibuundu ya yandi me kubwa. Yandi me monaka bima nionso ke salama, kasi yandi ke kwikila kaka. Ata ti . . . ? . . . Beto ke tentika maboko ya beto na zulu ya yandi, mpe kulutisa balusakumunu ya beto na yandi. Pakula yandi, Mfumu, na ngolo, na Ndinga, Mfumu, mpe fidisa yandi na konso kitini ya ntoto! . . . ? . . . bika ti yawu vwanda na zulu ya yandi mpe kusadisa yandi. Mpe beto ke fidisa yandi, na Nkumbu ya Yesu Klisto. Amen.

<sup>50</sup> Mpangi Ruddell, nge ke vwandaka ntangu nionso na diboko ya kimpangi. Mu zaba Mpangi Ruddell. Ya ke monana mutindu—mutindu mwana ya munu mosi ya bakala. Papa ya yandi mpe munu, mama, me zabana mosi na yankaka kubanda ntama. Mpe mu zaba Mpangi Ruddell ti yandi kele kisadi ya Nzambi. Mu me salaka na yandi. Nzambi sakumuna nge, Mpangi Ruddell.

<sup>51</sup> Yinki kele nkumbu ya yandi? Nani nge kele, mpangi-bakala? [Muntu mosi me tuba, “Semeki ya bakala Martin.”—Mu.] Mpangi Martin, nge zaba yandi, Mpangi Martin?

Yinki kele nkumbu ya nge? [Mpangi-bakala me tuba, “Révérend McComas.”—Mu.] Mpangi McComas. Mu banza ti kele na muntu mosi ve awa yina zaba yandi, kasi yandi kele. . . Yinga, bakala yayi awa kuzaba yandi, Mpangi Tyler. Mpe yandi me kwisa samu na kuvwanda. . . samu ba tentika maboko na zulu ya yandi, ti yandi ke vwanda munati ya Nsangu ya mbote. Mpangi MacComas, wapi nge me katuka, Mpangi McComas? [“Rockford, na Illinois.”] Rockford, na Illinois. [“Nge bokilaka yinzo ya munu, na sabala me luta, to Kilumbu ya ntete me luta na nkokila, mpe nge sambilaka samu na kento ya munu.”] Oh, ya kieleka? Na Tucson. [“Tucson, na Arizona.”] Oh, mu ke bambuka moyo na lubokilu ya allo-allo ntangu yayi. [“Yandi telemaka na suka yina landaka.”] Lukumu na Mfumu!

[Mpangi Martin me tuba kima na Mpangi Branham—Mu.] Yinki nge ke tuba? [“Mpangi ya munu ya kento ya leki na kati ya baleki ya munu ya bakento.”] Mpangi ya nge ya kento. [“Yandi kele awa ntangu yayi. Yandi vwandaka kikata.”] Na yina, yandi kele awa ntangu yayi, ba sambilaka samu na yandi, na nkokila yina, na Tucson, na nzila ya allo-allo. [“Kikata.”] Kik- . . . [“Yandi kumaka kikata, mpe yandi kele awa ntangu yayi.”] Yandi vwandaka kikata, bilumbu fyoti me luta, mpe yandi kele awa ntangu yayi. Mpangi Martin zaba yawu, nkundi. Kuyituka ve ti yandi zola kubaka Nsangu!

Beto tentika maboko na zulu ya mpangi ya beto ya bakala.

<sup>52</sup> Nzambi ya luzolo, mu ke tentika maboko, na bantu yankaka yayi, na zulu ya kisadi ya Nge, mpe ke pesa yandi diboko ya kimpangi, ke sambila ti balusakumunu ya Nzambi ke. . . ? . . . ti Nge me tuma yandi na kuvwanda. Lusakumunu ya Nge kuvwanda na zulu ya yandi, mpe kutwadisa yandi mpe kusungika yandi, na Nkumbu ya Yesu Klisto. Amen.

Diboko ya kimpangi, mpangi ya munu ya bakala, mpe bima yayi kuvwanda na nge. Nzambi kuvwanda na beno.

<sup>53</sup> [Muntu mosi me tuba, “Mpangi Branham?”—Mu.] Yinga, mpangi-bakala? [“Mu kele mosi yina zola yayi mpe.”] Mbote mingi, tata. Mu ke kwikila yayi kele. . . [“Mpangi Darris.”] Mpangi Darris. Mu zaba ve. . . [“Mu zaba Mpangi Earl mpe Mpangi Brewer.”] Bakala yayi kele Mpangi Darris. Wapi kisika nge me katuka, mpangi-bakala? [“Black Rock, na Arkansas.”] Black Rock, na Arkansas. Mpangi-bakala. . . [“Mu zaba yandi, mpangi-bakala.”] . . . zabaka yandi. Muntu yankaka, mu ke kwikila, awa, me tuba. . . Mpangi Brewer. Mu banza ti mu kutanaka na bawu, na suka yayi. Mpe—mpe Mpangi-kento Vayle, mu banza, Mpangi Vayle, mpe bayina me zaba yandi, mpe kuzaba yandi kuvwanda muntu ya Nzambi, kisadi ya Nzambi. Mbote mingi!

<sup>54</sup> Mbote, ntangu yayi, mpangi ya munu ya luzolo, kuvwanda munati ya Nsangu, beto zola nge zaba ti beto ke telama na

manima ya nge, kusala nyonso yina beto lenda sala. Beto ke sambila samu na nge, ti nge mpe ke nata Nsangu yayi na bitini ya ntama kisika Nzambi me tuma nge na kukwenda.

Beto tentika maboko ya beto na zulu ya Mpangi ya beto Darris.

Nzambi ya luzolo, beto ke tentika maboko ya beto na zulu ya mpangi ya beto ya bakala, na kupesaka yandi diboko ya kimpangi, mpe beto ke fidisa yandi na Nkumbu ya Yesu Klisto, ti Nge ke pakula yandi. Mpe . . . ? . . . pesa yandi diboko ya kimpangi! . . . ? . . . Mpe Mpeve ya Nge ke kwenda na yandi, mpe ke twadisa yandi mpe ke sungika yandi, na Nkumbu ya Yesu Klisto. Amen.

Nzambi kusakumuna nge, mpangi-bakala.

<sup>55</sup> Ntangu yayi, mu ke kwikila, Mpangi Anthony. Mingi na kati ya beno zaba Mpangi Anthony. Yandi ke vwandaka awa na beto kubanda ntama. Mu zaba ti yandi kele kisadi ya Klisto, munu mosi. Mu banza ti yandi kele ntwenya ya bakala ya kubiekama. Ba me tulaka ntete ve maboko na zulu ya yandi na ntwala ya bantu. Yandi vwandaka zaba ve ti yayi ke salama, bankundi. Beno me mona? Kasi ntangu yayi kele ya mbote mutindu ntangu yankaka. Na yina beto ke tentika maboko na zulu ya Mpangi Anthony mpe beto ke pesa yandi diboko ya kimpangi. Nzambi fwana kusala lubyalusu. Yayi kele kaka samu yandi zaba, mpe beno kuzaba, ti beto ke kwikila mpangi-bakala yayi mpe beto ke zolaka yandi, mpe yandi kele mosi ya beto, na Nsangu. Mpe beto zola ti yandi kuzwa balusakumunu ya Nzambi, mpe yawu yina beto ke lomba na yandi. Beto sambila, na yina beto ke tentika maboko ya beto, na zulu ya mpangi-bakala.

<sup>56</sup> Nzambi ya luzolo, mwa kisadi ya Nge yayi ya kukikulumusa, Mfumu, ke kwisa na nkokila yayi, samu ti ba—ba tentika maboko na zulu ya yandi, mpe diboko ya kimpangi kupesama na yandi na ntwala ya bantu, na dibuundu yayi. Mfumu, Ngolo ya Nge ya nene ke fidisa mwana-bakala yayi na kitini ya ntoto mpe na konso kisika yina Nge me bokila yandi na kukwenda. Mpe bika ti yandi kwenda mpe nata luvukulu na bantu ya disumu mpe ya kimbevo, mpe kusadila Nge, Mfumu, bilumbu nionso ya luzingu ya yandi. Bika ti Nge twadisa yandi, sungika yandi. Bika ti balusakumunu ya beto kuvwanda na yandi, mutindu beto ke fidisa yandi, na Nkumbu ya Yesu Klisto. Amen.

Nzambi sakumuna nge.

<sup>57</sup> [Muntu mosi ke na kutuba na Mpangi Branham—Mu.] Huh? Oh, mu zaba ve. Beto kele na nsinga ya allo-allo; ba-centime makumi tanu na muniti mosi. Ya vwandaka na muntu yankaka awa yina vwandaka zola . . .

Beno mata awa mpe beno tuba nkumbu ya beno, nani beno kele, bampangi-babakala, na micro yina kele kaka *awa*. Beno tuba na bawu kaka yina. [Konso mpangi-bakala ke tuba nkumbu

ya yandi, “Pat Tyler,” “Claude Boggess,” “Dale Potter,” “. . .?. . . Henassy,” “James Humes,” “Earl Horner.”—Mu.] Ya kele bawu? [Muntu mosi me tuba, “Yinga.”] Bampangi ya munu.

Bantu yayi, beno ke kwikila ti Nsangu yayi kele Kieleka yina me katuka na Ndinga ya Nzambi? [Bampangi me tuba, “Amen.”—Mu.] Beno ke kwikila yawu na ntima ya beno ya muvimba? [“Amen.”] Mbote mingi. Mpe beno kele na nsatu, mpe beno ke banza ti kana beto ke tentika maboko na zulu ya beno. . . . Beto zola beno zaba ti beto kele na beno, mpe beto ke sala nyonso yina beto lenda sala samu na kusadisa beno.

Mpe ntangu yayi mu zola ti beno bampangi, samu ti mu lenda tentika maboko na zulu ya bawu diaka, beno belama awa ntangu yayi. Mpe beto kulumusa bayintu ya beto, na yina beto ke tentika maboko na zulu ya bawu.

Nzambi ya luzolo, awa kele nkonga ya bantu. Mu ke tentika maboko ya munu na zulu ya mosi na mosi ya bawu, na Nkumbu ya Yesu Klisto, Mwana ya Nzambi. Mpe bika ti Nge, Yina me bokila bawu na kuvwanda milongi, ti bawu longa Yawu, Mfumu, bilumbu nyonso ya luzingu ya bawu, mpe. . .?. . . kulonga Nsangu ya mbote na konso kivangu. Beto ke pesa bawu diboko ya kimpangi, mpe ke sambila ti basakumunu ya Nge kuvwanda na bawu, Mfumu, mutindu beto me sakumuna bawu, beto ke fidisa balusakumunu ya beto. Bika ti bawu kwenda na konso kitini ya ntoto yina Nge me bokila bawu na kukwenda. Bika ti bawu sala mpe sadila Nge na kusalu yina Nge me bokila bawu na kusala. Bika ti bawu vwanda misadi ya kiekisa mpe ya kieleka ya Nzambi. Pesa yawu, Mfumu. Mpe beto ke lomba yawu na Nkumbu ya Yesu Klisto.

<sup>58</sup> Nzambi beno, nionso, bampangi-babakala. Nzambi sakumuna beno. Nzambi sakumuna nge, mpangi-bakala. Nzambi sakumuna beno. Nzambi sakumuna nge, Mpangi Humes. Mfumu kuvwanda na beno, beno nionso.

Nsinga ya ngwisani kusakumuka  
Bantima ya beto na zola ya Baklisto;  
Ngwisani ya mpeve mosi  
Mutindu yina ya Zulu.

<sup>59</sup> Yandi kele mbote ve? Beno banza kaka ntangu yayi, milongi yikwa kele awa na nkokila yayi samu na kutentika maboko na zulu ya bawu!

<sup>60</sup> Mu vwandaka zaba ve ti beto vwandaka na nsinga ya allo-allo. Kana bantu yina kuna ke lemvokila munu samu na yawu; mu vwandaka zaba yawu ve. Beno me mona? Mu vwandaka zaba kaka ve ti ba zolaka kuvutukila mwa Nsangu yayi na nkokila yayi. Kasi beto kele. . . .

<sup>61</sup> Ntangu yayi beto ke tanga Ndinga mpe beto ke sambila, mpe beto ke kota mbala mosi na Nsangu yayi yina mu ke banza ti Mpeve-Santu ke pesa munu na kulonga na beno na nkokila yayi.



<sup>62</sup> Mpe ntangu yayi na yina beto ke baka na . . . samu na dilongi, mu ke zabisa yawu na mwa ntangu fioti. Beto baka na Nombres, kapu ya 22, nzila ya 31. Nombres 22:31, samu na dilongi. Na yina beno ke sosa, kana beno zola kutanga, beno tanga yawu to kusonika yawu.

<sup>63</sup> Mu zola ti beno nionso kubambuka moyo na munu ntangu yayi, tii kuna mu ke mona beno diaka, mu banza, na éte yayi, kana Mfumu kuzola. Mpe kana kima kusalama, ti mu ke kwenda ve na bayinsi ya nzenza, mu ke vutuka. Kasi beto ke kwikila ntangu yayi ti, mutindu nionso yayi me yilama, ti Mpeve-Santu ke fidisa beto ntangu yayi na mutindu yina Yandi solaka samu na Yandi mosi na kufidisa beto. Mpe ya kele mutindu yina beto zola kusala yawu. Mfumu kusakumuka!

<sup>64</sup> Tata, beto ke tanga Ndinga ya Nge. Nge ke sakumuna Yawu mpe ke pakula Yawu na lubakusu ya beto, beto ke lomba yawu Nkumbu ya Yesu Klisto. Amen.

<sup>65</sup> Buku ya Nombres, kapu 22 mpe nzila ya 31.

*Mpe MFUMU zibulaka meso ya Balaam, mpe yandi monaka wanzio ya MFUMU me telama na nzila, mpe mbele ya yandi ya kutelemisa na diboko ya yandi: mpe yandi kulumusaka yintu ya yandi, mpe yandi kubwaka na kizizi ya yandi.*

<sup>66</sup> Ntangu yayi, na lutangu ya yayi, samu na kutunga dibanza na zulu ya yawu, mu zola kubaka dilongi: *Nzambi Ke Sobaka Dibanza Ya Yandi Samu Na Ndinga Ya Yandi?*

<sup>67</sup> Yina kele yintu ya dilongi, mpe ya kele Kieleka ya nene yina beto fwana bakula. Nzambi lenda tuba kima mosi mpe kutuba, “Beni lemvo kila munu samu mu me tuba yawu?” Nzambi lenda vutukila Ndinga ya Yandi, na manima Yandi me tuba Yawu?

<sup>68</sup> Ntangu yayi, mu me sala nsamunu yayi, kikuma mu me soola nsamunu yayi, ya vwandaka samu ti ya kele mosi ya bansamunu ya Biblia yina mutangi, na kumekaka na kumona, to kumeka kutuba ti Nzambi ke sobaka dibanza ya Yandi; yayi ke monana ti Yandi sobaka dibanza ya Yandi kulutula kisika nionso na kati ya Biblia, yina mu zaba, samu ti Yandi tubaka na Balaam kima mosi mpe na manima tubaka na yandi kima yankaka. Mpe ntangu yayi, bantu mingi mekaka na kutuba ti Balaam vwandaka kaka, oh, nganga-nkisi to kima mosi. Kasi Balaam vwandaka nganga-nkisi ve. Yandi vwandaka profete ya Mfumu.

<sup>69</sup> Ntangu yayi, beto ke banda na kuyema fioti lufulu ya Nsangu, ntete. Israel vwandaka na nzietolo ya bawu na Pales- . . . samu na kukwenda na Palestine, bawu katukaka na Egypte. Mpe Mfumu vwandaka na bawu, mpe bawu vwandaka . . . Mbeni nionso yina vwandaka basika na ntwala ya Israël vwandaka katuka na nzila, samu Nzambi tubaka ti Yandi ke fidisa ba-frelon na ntwala ya bawu samu na kubengana mbeni, ntangu nionso ba ke tambula na kutumama na musiku ya

Yandi. Kisalu vwandaka nene mingi ve. Ba-Amalécite, bilombe ya kilumbu yina, vwandaka tuba kima mosi ve samu na Israël. Ata ti bawu vwandaka bantu ya fioti na ntela, kasi bawu vwandaka tambula na MUTINDU ME TUBA MFUMU. Na yina ata ti nionso yina mbeni vwandaka, Nzambi ntangu nionso monaka ti Bandinga ya Yandi ya nsilulu kusala ve yimbi na Israël.

<sup>70</sup> Mpe Israël ya Ngwisani ya Ntama kele kifwanukusu ya Kento ya makwela ya Ngwisani ya Malu-malu, yina ke basika na yinza, yina ke tambula na nzila yina ke kwenda na Canaan, to na Canaan yina beto ke kwenda, Millenium.

<sup>71</sup> Ntangu yayi, ntangu yayi, beto ke mona ti Moab awa kele kifwanikusu ya dibuundu. Mpe Moab . . . Bawu kufwaka bantinu yankaka mpe vwandaka bengana mbeni, bawu kufwaka nionso, bakaka yinsi, mpe belamaka tii kuna pene-pene ya Moab. Ntangu yayi, Moab vwandaka ata fioti ve yinsi ya mimpani. Moab vwandaka yinsi yina vwandaka sadila Nzambi mosi yina Israël vwandaka sadila. Mpe yinsi ya Moab vwandaka na kisina yina bandaka na mwana Lot ya bakala, na nzila ya mwana ya yandi mosi ya kento. Mpe yandi, na kuvwandaka mubandisi ya yinsi yayi, mpe yandi bongisaka bantu ya yandi ya lukumu mpe nionso yina, mpe yandi salaka yinsi ya nene kuna, mpe ba kumaka mingi mpe landilaka mutindu yina.

<sup>72</sup> Mpe, ntangu yayi, Israël vwandaka ya nkuna ya Abraham, ya Lot ve. Israël basikaka na Isaac, Jacob. Mpe Israel salamaka na makanda yina kumi na zole ya Jacob, yina ba bokilaka na ntwala “Israël,” samu yandi nwanaka na Mfumu. Mpe Moab awa . . .

<sup>73</sup> Ntangu yayi, na yayi, mpe beno bantu yina ke landa beto na—na allo-allo, Mu zola tuba ntete ti mu—mu ke zola ve kuvweza, mpe mu banza ti mu ke sala yawu ve. Kasi, Nsangu yina me pesama na munu, mu fwana vwanda ya kukwikama na Nsangu yina, to mu ke vwanda muntu ya luvunu. Beno me mona? Mu—mu lenda tuba kima yankaka ve na nganda ya yina ba fidisaka munu na kutuba.

Mpe mu—mu ke banza ti mbeni ya nene ya kimvuka ya Baklisto bubu yayi kele mabuundu ya ba-organisation. Mu ke kwikila na ntima ya munu ya muvimba ti yawu ke suka na kidimbu ya kibulu, yina mu lenda, mu banza ti mu lenda lakisa yawu na nzila ya Biblia na lusalusu ya Nzambi. Mu me salaka yawu dezia. Ti, ya ke sala kidimbu ya kibulu, na kimvuka ya mabuundu. Samu, Nzambi salaka yawu ata fioti ve, ata na ntangu mosi ve, dibuundu ya kusungama, dibuundu ya organisation, ata fioti ve. Yandi me salaka yawu ata fioti ve.

Mpe ntangu nionso yina muntu salaka organisation, Mpeve ya Nzambi vwandaka bika yawu mpe vwandaka vutuka ata fioti diaka ve. Beno yufula konso muntu yina ya masolo, to beno lenda tanga beno mosi. Ata fioti ve! Ntangu ba salaka organisation,

Nzambi tulaka yawu na lweka, mpe ya kwendaka kisika yina; ya bikalaka kuna, bikanaka kubanda na ntangu yina. Bamambebele kumaka mingi, kasi ata fioti ve ya vwandaka na kuvumbuka ya Mpeve; ata fioti, diaka ve.

<sup>74</sup> Moab, awa, kele kifwanikususu ya yayi, samu ti bawu vwandaka yinsi yina ba me bongisa; na yinsi ya bawu mosi, mutindu na denomination ya bawu. Mpe kuna ba vwandaka na bansambulu ya bawu mosi, mpe nsambulu ya bawu vwandaka nsambulu mosi yina Israel vwandaka na yawu. Bawu vwandaka ba-Moabite mpe vwandaka kwikila na Yehowa Nzambi, kasi bawu vwandaka kimvuka ya bantu ya organisation.

<sup>75</sup> Mpe, ntangu yayi, mutindu bawu ke monikisa dibuundu ya kimuntu, Israel ke talisa dibuundu ya kimpeve na nzietelo ya yandi. Ntangu yayi, Israel vwandaka ve yinsi yina ba me bongisa. Na ntangu nionso bawu vwandaka landa Nzambi, bawu vwandaka na kimpwanza. Ba vwandaka kuma kisika mosi, ba vwandaka bizieti, ba vwandaka ve na kisika ya kukwenda. Konso kisika yina Dikunzi ya Tiya vwandaka kwenda, ba vwandaka kwenda na Yawu. Bawu vwandaka yinsi yina ba me bongisa ve. Bawu vwandaka na organisme mosi na kati ya bawu, yina bawu kuzwaka na nzila ya nzengolo na nsi ya musiku ya Nzambi, kasi ya vwandaka ata fioti ve yinsi yina ba me bongisa na ntangu yina. Ntangu bawu kumaka yinsi ya organisation, ya kele kisika yina bawu kubwaka mpe losaka Mesiya ya bawu.

<sup>76</sup> Mpe ntangu yayi beto ke mona, ntangu nionso, ti ntangu bampeve yayi ya kimuntu mpe ya kimpeve, ya mabuundu mpe ya ba-organisation, ke kutana, ya ke vwandaka ntangu nionso na kututana. Ya ke kondwaka ata fioti ve na kuvwanda mutindu yina. Ya ke vwandaka ntangu nionso na kututana. Samu, beto ke mona ti samu na yina ya yawu kele ti ya kele na musoki mosi. Mpe kuna, na kati ya zuwa yayi, ya ke nataka musoki ya kimuntu, bakumekula. Mpe beto ke monaka yawu bubu yayi, mutindu ya vwandaka na ntangu yina. Ntangu Nzambi ke sala kima mosi samu na muntu mosi, muntu nionso ke meka kumekula kaka mutindu Nzambi salaka samu na muntu yina. Beno me mona, ya ke nataka kunwana, mpe ya ke butaka kimpala. Mpe na yina kana bawu lenda ve, na lweka yankaka, kuzwa bandandu ya kimpeve, kuna bawu ke baka yawu na ngolo ya politiki, to ba ke yingisa kima mosi, samu na kunata muvusu na mabanza ya bantu, samu na kubenda bilandi na manima ya bawu.

<sup>77</sup> Ya kele kieleka yina salamaka na mbandukulu; mutindu Caïn mpe Abel, bawu zole bana ya babakala awa na zulu ya ntoto. Mpe ntangu Abel pesaka na Nzambi munkayulu ya mbote mingi kulutila yina ya Caïn, mpe Nzambi siamisaka Abel, na kukulumukaka mpe na kundimaka munkayulu ya yandi, ya nataka musoki na Caïn, samu ti yandi vwandaka na musoki ya mpangi ya yandi, mpe kufwaka mpangi ya yandi.

<sup>78</sup> Yawu bandaka na mbatukulu, ti ntangu yina ya kimuntu mpe ya kimpeve. . . Kasi Cain na Abel vwandaka sambila Nzambi mosi, bawu zole tungaka ba-autel ya mutindu mosi, mpe bawu zole vwandaka sambila Nzambi mosi, na yinzo-Nzambi mosi, na autel mosi. Kasi Cain, na nzila ya mabanza ya nsuni, nataka bambuma ya yinsi mpe tulaka yawu na zulu ya autel mutindu munkayulu, mu banza ti yayi vwandaka kieleka mulemvo yina Nzambi vwandaka vingila. Na yina yandi nataka yawu, mutindu bantu ke banzaka bubu yayi, “bambuma yina Adam mpe Eve kudiaka, yawu yina nataka disumu.” Mpe, nionso yina, mu banza ti bubu yayi ba ke tuba ti ya vwandaka “grenade” to kima mosi ntangu yayi. Bayankaka na kati ya bawu tubaka, ntama mingi ve, vwandaka tuba ti ya vwandaka kima yankaka.

<sup>79</sup> Mpe, kasi Abel vwandaka na munkayulu ya kieleka. Yandi zabaka ti yawu vwandaka menga yina salaka yawu, na yawu yandi nataka mwana-dimeme. Mpe ntangu Nzambi ndimaka ya yandi, ntangu yayi, Abel, na nzila ya lukwikilu, na nzila ya luzayikisu, mutindu yankaka ve. Ba vwandaka me sonika Biblia ve. Na yina, beno me mona, mbandukulu ya kieleka ke Kieleka ya Nzambi yina me monisama pwelele, mpe Dibuundu ya muvimba ya Nzambi ya moyo me tungama na zulu ya yawu.

<sup>80</sup> Yesu, kilumbu mosi, katukaka na mongo, tubaka na bilandi ya Yandi, “Nani bantu ke tuba ti Mu kele Munu Mwana ya muntu?”

“Bayankaka ke tuba ti Nge kele Moïse, mpe bayankaka ke tuba ti Nge kele Elie, mpe Nge kele Jérémie, to mosi ya baprofete.”

Yandi tubaka, “Kasi Nani beno ke tuba ti Mu kele?”

<sup>81</sup> Ya kele ntangu ntumwa Pierre, ya kutwadisa na kimpeve na Nzambi, kindisamaka na Mpeve, salaka nsamunu yina ya mfunu mingi, “Nge kele Klisto, Mwana ya Nzambi ya moyo.”

<sup>82</sup> Beno bakula nsamunu yayi. “Nge kele muntu ya kiese, Simon, mwana ya Jonas, nzutu mpe menga ve me monisa yawu na nge. Tata ya munu yina kele na Mazulu me monikisa yayi na nge. Nge kele Simon. Na zulu ya ditadi yayi. . . ”

Wapi ditadi? Ntangu yayi, Katolika ke tuba, “Na zulu ya Pierre, ditadi, mwa ditadi.” Mpe ba-Protestant ke tubaka, “Na zulu ya Klisto, Ditadi.”

Ya vwandaka ve mutindu yankaka; kasi ya vwandaka na zulu ya luzayikisu ti Pierre vwandaka, Nani Yandi vwandaka. “Muntu ve lenda kwiza na Munu,” tubaka Yesu, “kaka kana Tata ya Munu kubenda yandi ve. Mpe nionso yina Tata me pesa Munu ke kwisa na Munu.”

“Nge kele Klisto, Mwana ya Nzambi ya moyo.”

<sup>83</sup> “Nge kele ya kusakumuka, Simon, mwana ya Jonas; nzutu mpe menga ve me monisa yawu na nge, kasi Tata ya Munu yina

kele na Mazulu. Na zulu ya ditadi yayi mu ke tunga Dibuundu ya Munu, mpe mielo ya difelo lenda ve kununga yawu.” Ndinga ya Nzambi yina me monisama pwelele na Mpeve!

<sup>84</sup> Beno tala, Abel, na lukwikilu na Nzambi, pesaka munkayulu ya kulutila mbote. Mpe mukwikidi ya nsuni banzaka ti ya vwandaka bisalu ya maboko ya yandi mosi, ti, bambuma ya yandi mpe dikabu ya yandi ya kitoko yina yandi nataka, yina Nzambi ke ndima, mpe yawu nataka kututana mosi.

Beto ke mona ti Abraham na Lot vwandaka na kututana mosi.

<sup>85</sup> Beto ke mona ti Moïse mpe—mpe Dathan, Koré, vwandaka na kututana ya mutindu mosi.

Moïse, yina vwandaka profete yina ba me byadisa na Ndinga ya Mfumu, siamisama ti ba soolaka yandi samu na kuvwanda ntwadisi ya ngunga yina, mpe ti Abraham silaka bima nionso yayi, mpe awa Moïse salaka kieleka yina Nzambi tubaka, ke salama.

Mpe Koré, vwandaka ya nsuni, zolaka telemisa organisation na kati-kati ya bawu. Yandi vwanza zola kusala kimvuka ya bantu. Mpe Nzambi ke salaka ve na bantu mutindu yina. Ya ke talisaka kaka kuna, na kati ya Masonuku yina, kifwanikusu ya nzyetolo bubu yayi, ti organisation kele ve yina Nzambi me tuma. Na yina, ntangu Koré salaka yawu, yandi tubaka na Moïse, “Nge ke baka nyonso nge mosi.” Na nzonzolo yankaka, “Dibuundu ya muvimba kele santu! Kasi, nge ke tuba ti kaka nge kele muntu ya santu. Nge ke na muswa ve ya kusala kima mutindu yina. Nge ke meka na kukumisa nge mosi muntu ya nene. Beto nionso kele ya santu. Beto nionso kele bana ya Nzambi.”

<sup>86</sup> Mpe Moïse balulaka yintu ya yandi mpe kwendaka. Yandi tubaka, “Mfumu, yinki mu ke sala?”

<sup>87</sup> Nzambi tubaka, “Kabuka na yandi. Mu me kuzwa yina me lunga samu na yawu.” Mpe Yandi minaka yandi na zulu ya ntoto.

<sup>88</sup> Beno me mona, ya vwandaka na kututana mosi. Ntangu muntu ya nsuni mpe ya kimpeve ke kutana, ya ke vwandaka ntangu nyonso na kututana. Ntangu Judas mpe Yesu kukutanaka, ya vwandaka na kututana: Mosi, Mwana ya Nzambi; yankaka yina, mwana ya Satana. Kaka mutindu Cain na Abel, ya vwandaka na kututana ntangu bawu kukutanaka. Mosi na kati ya bawu vwandaka trésorier ya dibuundu, mpe Yina yankaka vwandaka pasteur. Mpe na yina, beto ke mona kima ya mutindu mosi bubu yayi, na kima mosi dyaka. Dénomination ya nsuni na Kento ya makwela ya kimpeve ya Klisto. Kento ya makwela ya kimpeve ya Klisto kele mingi ya kuswaswana na ba-organisation ya nsuni, ti ba lenda ata fioti ve kufwanikisa yawu nionso.

<sup>89</sup> Ntangu yayi beno tala, muntu ya nsuni ke mekaka ntangu nionso kukifwanikisa na muntu ya kimpeve. Kasi, mutindu na Jacob mpe Ésaü, ya ke simba ve. Ya simbaka ve. Ntangu yayi, ntangu ya kumaka na kusala bisalu ya mbote, mu—mu ke kwikila ti kieleka Ésaü vwandaka muntu ya mbote mingi kulutula Jacob, na meso ya bantu. Yandi vwandaka meka na kukeba tata ya yandi; yandi vwandaka mpofo, profete. Mpe bima nyonso yayi yina yandi vwandaka meka na kusala, kasi dyaka Ésaü banzaka ve ti yina vwandaka kaka kisalu ya nsuni. Yandi vwandaka banza ti yandi lendaka kota samu na yina yandi salaka, kusala kima mosi ya mbote samu na muntu yankaka, yina vwandaka mbote mingi. Kasi Jacob, moyo ya yandi nyonso vwandaka samu na kuzwa bukuluntu yina, mpe yawu yina Nzambi kuzabaka na kati ya yandi mutindu ya kimpeve.

<sup>90</sup> Beno tala, mpe ya ke salaka ntangu nionso ti muntu ya nsuni kuyina muntu ya kimpeve. Ya salaka ti Caïn kuyina Abel. Ya salaka ti Koré kuyina Moïse. Ya salaka ti Judas kuyina Yesu. Mpe ya landilaka kaka mutindu yina. Ya ke salaka ti muntu ya nsuni kuyina muntu ya kimpeve, kaka mutindu Caïn na mbandukulu yinaka Abel, yina Nzambi ndimaka munkayulu, mpe mekaka na kubebisa yandi.

Mpe bawu ke mekaka na kubebisa lukumu. Bawu ke meka na kubebisa bima nyonso, samu ti ya kele kima ve kasi musoki. Yawu bandaka na Caïn mpe talisamaka ti yawu vwandaka musoki, mpe ya kele dyaka kima mutindu mosi bubu yayi ntangu muntu ya nsuni (ya nsuni) mpe muntu ya kimpeve ke kutana kintwadi. Ya ke talisa ti ya kele Satana, mutindu yankaka ve, samu musoki me katuka na Satana. Mpe yina ke nataka kumekula ya Kieleka, muntu mosi samu na kumeka na kumekula kima yina kele ve, ba me tuma bawu ve na kusala. Yikwa beto me mona na bilumbu yayi! Oh, la la, yikwa!

<sup>91</sup> Na yina beto ke mona ti Nzambi ata fio- . . . ke sobaka ata fioti ve dibanza ya Yandi samu na Ndinga ya Yandi ya kieleka. Kasi, yina Yandi ke bokila, yandi yina Yandi ke tuma. Muntu yankaka ve lendaka baka kisika yina. Muntu mosi ve lenda baka kisika ya Moïse. Ata ti ba-Koré yikwa ke telema, mpe ba-Dathan yikwa; ya vwandaka Moïse, Nzambi bokilaka, kukondwa kutala.

<sup>92</sup> Kasi, mpe kana bantu ke tambula ve na luzolo ya Yandi ya kulunga, Yandi kele na luzolo ya muswa Yandi ke bika beno kutambula. Beno tala, Yandi ke bika yawu, mbote mingi, kasi Yandi ke sala ti yawu kusala samu na nkembo ya Yandi, na luzolo ya Yandi ya kulunga. Ntangu yayi kana beno ke zola . . .

<sup>93</sup> Kaka mutindu, na mbandukulu, ya vwandaka ve luzolo ya kulunga ya Nzambi samu ti bana kubutuka na zulu ya ntoto na nzila ya sexe. Ve, tata. Nzambi vangaka muntu na fundu-fundu ya ntoto, fulaka mupepe ya luzingu na kati ya yandi, mpe yandi me kuma moyo yina ke zinga. Yandi bakaka na bakala yina

nsadisi, mpe salaka kento mosi samu na yandi. Yina vwandaka luzolo ya ntete mpe ya kieleka ya Nzambi. Kasi ntangu disumu kotaka mpe salaka diambu yina ya salaka, na yina Yandi pesaka muswa na bakala na kukwela kento, na mutindu ya kulunga, mpe kuzwa bana na nzila ya yandi. “Beno kuma mingi mpe beno fulusa ntoto, na yina, ya kele mutindu yina beno ke sala yawu.” Kasi, beno me mona, ata mbala mosi ve ti ya vwandaka luzolo ya Yandi ya kulunga.

<sup>94</sup> Na yina, bima nyonso yayi yina kele na mbandukulu fwana vwanda na nsuka. Disumu nionso ke zimbana kimakulu. Disumu nionso fwana zimbana. Na yina, na Millénium ya nene ntangu mvumbukulu ke kwisa, beto ke butuka diaka ve na nzila ya batata ya beto mpe bamama ya beto, kasi Nzambi mutindu Yandi salaka na mbandukulu ke bokila muntu na fundu-fundu ya ntoto, mpe kisadisi ya yandi na yandi. Ya kele kieleka. Ya kele mutindu yina Yandi salaka yawu na mbandukulu.

<sup>95</sup> Na yina, Nzambi ke sobaka ata fioti ve dibanza ya Yandi, kasi Yandi ke pesa beno muswa ya kukwenda na ntswala. Ntangu yayi, yayi kele nzila ya yinda mingi yina me baluka samu na kukuma na yina mu zola tuba awa samu na yayi. Kasi, mpe, kasi, ya kele, beno ke . . . mu zola ti beno bakula yawu. Beno me mona? Nzambi ke pesa muswa na beno na kusala kima mosi, mpe ke sakumuna beno na kusalaka yawu, kasi dyaka ya kele ve luzolo ya Yandi ya kulunga.

<sup>96</sup> Nzambi pesaka muswa na Israel na kubaka musiku, na kapu ya Exode 19. Ntangu lemvo pesaka bawu ntete profete, Dikunzi ya Tiya, mwana-dimeme ya munkayulu, ngolo ya luvukulu, kasi ba bokilaka Musiku. Ya vwandaka ve luzolo ya Nzambi, kasi yawu kotaka samu muntu zolaka yawu. Mpe yandi vwandaka ya kusinga na nzila ya musiku yina yandi zolaka.

<sup>97</sup> Ya kele mbote na kuzwa luzolo ya Nzambi. Ya kele yina Yandi longaka beto. “Ti luzolo ya nge kusalama. Kimfumu ya Nge kukwisa. Luzolo ya Nge kusalama.” Beto fwana kukipesa beto mosi na luzolo ya Yandi mpe na Ndinga ya Yandi. Beno tula ve ntembe na Yawu. Beno kwikila Yawu. Beno meka ve na kuzwa nzila ya kubaluka Yawu. Beno baka Yawu kaka mutindu Yawu kele.

Bantu mingi ke zolaka kubaluka, samu na kubaka nzila yankaka. Mpe ntangu beno ke sala yawu, beno mosi ke mona ti beno ke kwenda na ntswala, beno ke mona ti Nzambi ke sakumuna beno, kasi beno ke sala na luzolo ya Yandi ya muswa kasi na luzolo ya Kinzambi ve, ya kulunga.

<sup>98</sup> Yandi ke bika yawu, mutindu mu me tuba, kasi Yandi ke—Yandi ke bika ve ti ya vwanda luzolo ya Yandi ya kulunga; kasi Yandi ke bika yawu kusala samu na kupesa lukumu mpe kusakumuna luzolo ya Yandi ya kulunga. Mpe kuzwa bana na nzila ya sexe kele mbandu ya yawu.

<sup>99</sup> Ntangu yayi beno tala, Moab, na kubanda, vwandaka yinsi ya makangu. Yawu bandaka, na mutindu ya kimakangu, ata ti na nzila ya tata ya mukwikidi mpe mwana-kento ya mukwikidi.

Ya kele kaka mutindu mosi, kana beno ke tala kifwanikusu yayi mpe beno ke sadila dibanza ya kimpeve, beno ke mona ti ya ke talisa denomination kaka pwelele kuna. Ya kieleka. Beno me mona, kima nionso kele yimbi. Mpe, beno tala, ntangu ba me nata yawu mutindu yina, ya lendaka ata fioti ve . . . Ya ke landila, mutindu mbuma ya mvula mpembe, yawu ke baluka kaka mpe ya kulutila mingi mpe mingi. Beno baka kifu mosi, mpe beno kwenda na kifu yina, mpe beno ke landila kaka na kubaluka mpe bima ke yikama, mpe bima nionso ke yikama, kima mosi na zulu yankaka.

<sup>100</sup> Mpe ya kele mutindu dibuundu bandaka. Ya kele mutindu yina yawu bandaka na Nice, na Rome, ntangu dibuundu ya Catholique ya Rome . . . Na mbandukulu ya kieleka, kisika yawu katukaka, vwandaka na Pentecote. Kasi ntangu bawu salaka organisation mpe kotaka na lukumu, samu na kukota na dibuundu, bawu bandaka na kusala, na kuvutukila bisambu, mpe na kutangaka chapelet ya bawu, mpe—mpe kusambila bantu ya kufwa, mpe bima nionso yayi yankaka. Mpe na yina ba bandaka na kubaluka, na kifu mosi na yankaka, kifu mosi na yankaka, tii kuna beno tala kisika ya me kuma bubu yayi. Ya ke na kutalisama mosi ve ya pentecote na kati ya yawu, na mutindu nionso. Beno me mona? Ya kele kifu ke yikama na zulu yankaka, mosi na zulu yankaka. Ya kele kaka na kima mosi ya kusala, ya kele, kuvwanza nionso mpe kuvutuka na mbandukulu.

<sup>101</sup> Na yina Martin Luther bandaka na kunungisama . . . Yayi zolaka vwanza dibuundu ya Luther, yina me kuma na kisika mosi ya zulu mingi. Beno me mona? Kana . . . Luther, ntangu yandi salaka organisation, yandi lendaka ve kubaka kusantisama ya Wesley, samu yandi salaka organisation; mpe bantu zolaka ve kukanga ntima na yawu, na yina Mpeve basikaka na kati ya yawu.

<sup>102</sup> Ntangu yayi, kimvuka ya bantu ya Lot awa; to, Moab vwandaka mwana ya mwana-kento ya Lot, mwana ya makangu na kubanda. Ntangu yayi beno tala, mutindu dibuundu ya kimuntu, Moab, ke talisa denomination ya kimuntu.

Israel ke talisa Dibundu ya kimpeve. Israel, yina vwandaka dibuundu ya kieleka, vwandaka kento ya makwela ya kilumbu yina, yina ba me bokila na kubasika na Egypte, mpe yina ba siamisamaka ti ya kele kieleka.

<sup>103</sup> Beno tala ntangu bawu, bawu zole kuvukanaka. Bawu zole pesaka munkayulu ya mutindu mosi, bawu zole tungaka, monaka ba-autel sambwadi, bawu zole pesaka munkayulu ya kuvedila, ya bangombe. Mpe bawu pesaka mpe munkayulu ya mameme, yina vwandaka talisa ti Mesiya vwandaka kwiza. Na



mutindu ya lufulu, bawu zole vwandaka kaka mutindu mosi. Israel, awa na kiwanda; Moab, kuna na zulu ya mongo. Mpe Moab na ba-autel sambwadi; Israel na ba-autel sambwadi. Moab na bangombe sambwadi; Israël na bangombe sambwadi. Moab na mameme sambwadi, yina vwandaka talisa nkwizulu ya Mesiya; Israël na bangombe sambwadi.

Wapi luswaswanu vwandaka na kati ya bawu? Landila misiku, bawu zole vwandaka ya kusungama. Kasi, beno me mona, Moab vwandaka ve na nsiamisa ya Nzambi na bawu; bawu vwandaka kaka yinsi mosi, kimvuka ya bantu ya lukumu. Kasi Israel vwandaka na profete na bawu. Ba vwandaka na Ditadi yina ba bulaka na bawu. Ba vwandaka na Dikunzi ya Tiya. Bawu vwandaka na nyoka ya kisengo, samu na kubelusa. Bawu vwandaka na balusakumunu ya Nzambi yina vwandaka tambula kintwadi na bawu, mpe bawu vwandaka bana ya Nzambi yina ba me bokila na kubasika.

<sup>104</sup> Ntangu yayi beto me mona ti ya kele kifwanikusu yina ke talisa na mutindu ya kulunga mabuundu ya bilumbu yayi. Mutindu, Moab vwandaka ve mutindu yayi. Israel vwandaka kizieti, ba vwandaka kwenda kisika na kisika; kisika nyonso Dikunzi ya Tiya vwandaka kwenda, bawu vwandaka kwenda na Yawu. Moab, vwandaka mutindu yina ve; bawu vwandaka na denomination ya bawu, kuna na yinsi ya bawu. Bawu vwandaka tambula ve, ba bikanaka kaka kuna. ba vwandaka na bantu ya bawu ya lukumu. Ba vwandaka tuba ti mambu lendaka salama mutindu yina, mpe bawu vwandaka na binwani ya bawu, ba vwandaka na binwati-mvita ya bawu, ba vwandaka na ntinu ya bawu, yina vwandaka pesa bawu bantumunu, mpe nionso yina.

<sup>105</sup> Kasi Moab monaka Israel na kima yina bawu vwandaka na yawu ve. Bawu monaka ngolo ya nene na kati ya Israel, mpe ya vwandaka profete. Mpe profete yina vwandaka Moïse. Mpe bawu zabaka ti na ntangu bitumba vwandaka mbote ve, bawu vwandaka telemisa kaka maboko ya yandi mpe vwandaka simba yawu na zulu kuna, mpe bitumba vwandaka soba. Na yina bawu vwandaka ve na kima ya mutindu yina, na yina bawu mekaka na kunwanisa yawu na politiki, na kubendama ya politiki. Bawu fidisaka bantu kusosa na yinsi yankaka profete yina ba tulaka na kisalu samu yandi kwisa na bawu, samu ti bawu kuzwa profete mosi, mpe ba lendaka vwanda na ngolo na kati ya bawu mutindu Israël vwandaka na yawu na kati ya bawu.

<sup>106</sup> Beno me mona kufwanikisa ya kimuntu? Beno lendaka mona dibuundu ya kimuntu bubu yayi? Ya me salama na kima ya mutindu mosi.

<sup>107</sup> Beno tala, ntangu yayi, bawu zole ke kuzwa baprofete. Luswaswanu mosi kaka vwandaka, Moïse, profete ya Nzambi, Ntinu ya yandi vwandaka Nzambi. Ya kele kisika yina yandi kele na bantumunu ya yandi, Ndinga ya Mfumu. Mpe Balaam, yandi

diaka, yandi vwandaka na ntinu, mpe ntinu yina vwandaka Balak, ntinu ya Moab, mpe yina kele kisika yina yandi kuzwaka bantumunu ya yandi mpe balusakumunu ya yandi. Na yina Moab tubaka na Balak, “Kwisa,” to Balaam, tubaka, “kwisa mpe singa munu bantu yayi, samu ti bawu ke fuluka na kizizi ya muvimba ya ntoto. Ba ke kwisa mpe ba ke kudia nionso mutindu ngombe ke kudiaka matiti.” Yandi tubaka, “Kwisa ntangu yayi. Mpe mu me bakula ti nge lendaka singa, nge lendaka sakumuna, nionso yina nge ke sala ke ndimama.”

<sup>108</sup> Ntangu yayi, beto zola bakula ti muntu yayi vwandaka profete yina Nzambi me tuma, kasi yandi me tekisa bukuluntu ya yandi samu na mitifi ya politiki. Kaka mutindu dibuundu me sala bubu yayi, mutindu Luther, Wesley, Pentecote, mpe kimvuka nyonso ya bawu, tekisaka yawu samu na kuzwa lukumu na organisation ya bawu. Moïse, na nsi ya bantumunu ya Nzambi; Balaam, na nsi ya bantumunu ya Balak. Kasi, bawu zole vwandaka ba-profete yina ba me bokila na Nzambi, mpe bawu zole vwandaka ya kimpeve. Beno tala luswaswanu. Muntu nionso vwandaka na ntwadisi: yina ya Moïse vwandaka ya Nzambi, yina ya Balaam vwandaka ya Balak.

<sup>109</sup> Beno tala awa mutindu ba ke talisa yawu na kimpeve, samu na kusiamisa ti yina ya kimuntu kele na kifu. Moïse, fidisamaka na Nzambi, na kati ya kisalu ya yandi, mpe tala profete yankaka ya Nzambi me kwisa kutelemina yandi. Beno lendaka banza yawu! Moïse, bokilamaka na Nzambi, tumamaka na Nzambi, telemaka na kati ya kisalu ya Nzambi; yandi kwisaka na kati ya kimvuka ya bantu yayi ya madidi, ya mambu ya nganda, mpe ba teleminaka yandi na profete yankaka ya Nzambi, yina Nzambi sakumunaka mpe tumaka. Wapi mutindu beno lenda sala luswaswanu? Bawu zole vwandaka na baprofete. Nzambi zonzaka na baprofete yayi zole.

<sup>110</sup> Mpe bayankaka na kati ya bawu ke tuba, “Nzambi tubaka, ‘Sala yayi.’ Nzambi tubaka, ‘Sala yina.’” Ntangu yayi, mu ke tula ve ntembe na yawu, kasi ya kele na ngaanda ya Ndinga ya Nzambi. Profete, ata ti yandi kele profete, yandi kele ve na ndonga. Bantu mingi ba ke vunaka mutindu yina. “Oh, mpangi-bakala yayi lenda sala yayi, mpe mpangi-bakala yayi lenda sala yina,” mpe kumanga Ndinga?

<sup>111</sup> “Ata ti mu me tuba bandinga ya bantu mpe bawanzio, ata ti mu kele na makabu, ti mu lenda katula myongo, ata ti mu ke pesa bimvwama ya munu nionso samu na kudisa bamputu, mu kele diaka kima mosi ve.”

“Bantu mingi ke kwisa na Munu na kilumbu yina, mpe ke tuba, ‘Mfumu, Mfumu, mu pesaka profesi ve na Nkumbu ya Nge? Mu basisaka ve, na Nkumbu ya Nge, bampeve ya yimbi mpe salaka bisalu ya ngolo?’ Mpe mu ke tuba na bawu, ‘Beno kwenda ntama, beno . . . Beno basika na Munu, beno misadi ya masumu

ya nkú. Mu zabaka beno ata fioti ve.” Kasi, bawu kwisaka na kundima ti bawu salaka yawu, kasi Yesu tubaka bawu vwandaka misadi ya disumu ya nkú. Yinki kele disumu ya nkú? Ya kele kima yina beno me zaba ti beno lenda sala, yina kele mbote na kusala, mpe kasi beno ke sala yawu ve. Beno me mona yina ke vwanda na bilumbu ya nsuka?

112 Beno kuwa ndonga ya muvimba! Yina vwandaka lukanu ya munu na nkokila yayi. Mu tubaka ti mu ke basika na ngunga ya yivwa, kasi mu ke vwanda fioti na manima, mu banza. Beno tala, yina vwandaka lukanu ya munu ya muvimba, samu na kutalisa beno ndonga yayi, na nzila ya Ndinga ya Nzambi, beno me mona, ti—ti Nzambi fwana zitisa Ndinga ya Yandi samu na kuvwanda Nzambi.

113 Ntangu yayi, beto ke mona ti bawu zole vwandaka bantu ya kimpeve, bawu zole vwandaka bapofete, bawu zole vwandaka yina ba bokilaka. Mpe Moïse, kaka na kati ya kisalu ya yandi, na Dikunzi ya Tiya ya malu-malu na ntwala ya yandi konso kilumbu, Mpeve ya Nzambi na zulu ya yandi, na ndonga ya kisalu ya yandi. Tala kisadi yankaka ya Nzambi me kwisa, yina Nzambi bokilaka, yina Nzambi tumaka, profete yina Ndinga ya Nzambi kwisaka. Awa kisika kele kisika ya kigonsa. Ata muntu mosi ve lendaka tula ntembe ti bakala yayi vwandaka ya Nzambi—ya Nzambi, samu ti Biblia ke tuba Mpeve ya Nzambi vwandaka tuba na yandi, mpe yandi vwandaka profete. Kasi, beno me mona, ntangu yandi bakaka mvutu ya kieleka na Nzambi, yandi zolaka ve kukangama na Yawu. Yandi salaka ve bukebi na Yawu, na yina yandi kwendaka telemina Moïse.

114 Ntangu yayi, Balaam sosaka luzolo ya Nzambi, na ntima ya yandi ya muvimba. Ntangu yayi, ntangu bantu ya nene yayi kwizaka mpe tubaka, “Balaam! Balak ntinu me fidisa, ti nge kwisa na yandi na nswalu nionso mpe nge singa bantu yayi ya Israel, samu ti ba me fuluka na zulu ya ntoto ya muvimba, mpe ntangu yayi ba me vwanda samu na kutelemina munu. Mpe bawu me bebisa konso kimfumu na nziunga, na nsi ya bawu. Mpe ntangu yayi beto zola ti nge kwisa kuna mpe nge kusinga bantu yayi. Samu ti, mu me bakula ti kana nge singa muntu mosi, yandi ke kusingama.” Ntangu yayi, beno me mona, yandi vwandaka muntu ya Nzambi. “Yina nge ke sakumuna, ke sakumuka.” Yandi vwandaka kisadi ya Nzambi.

115 Mpe Balaam ntangu yayi banzaka, na kuvwandaka profete, “Ya kele kaka na kima mosi samu na munu na kusala, mpe ya kele kusosa luzolo ya Nzambi.”

116 Yina kele kisalu ya profete, kana ba me bokila yandi samu na kuvwanda profete. Ntete, yinki profete fwana sala? Ya kele kusosa luzolo, Ndinga ya Nzambi. Yandi fwana sala yawu. Samu, na kuvwandaka profete, Ndinga ya Nzambi ke kwizaka na yandi. Ba ke tuba, “Tala, nge kele ve muntu ya théologie.” Biblia me

tuba ata fioti ve ti Ndinga ya Nzambi ke kwisaka na théologien. Ya kele bawu ke kotisaka Yawu na muvusu. Ndinga ke kwisaka na profete ya Nzambi.

117 Mpe awa vwandaka muntu yina vwandaka profete ya Nzambi. Mpe ntangu ba pesaka yandi kisalu, ba zolaka kupesa yandi kisalu, samu na kukwenda kusinga bantu yankaka ya Nzambi, beno tala, yandi kwendaka sosa luzolo ya Nzambi. Mpe yandi zolaka zaba luzolo ya Yandi ya kulunga, mpe Nzambi pesaka yandi luzolo ya Yandi ya kulunga samu na yawu. Luzolo ya yandi ya kulunga talisamaka na yandi. Yinki vwandaka luzolo ya Yandi? “Kukwenda ve!” Yina kele Ndinga ya ntete ya Nzambi. “Kukwenda ve na bawu. Kumeka ve na kunwanisa bantu ya Munu, yina ke tambula na kati ya banzila ya Munu ya kulunga.”

118 Ya kele mutindu yina bubu yayi, ba ke zola kuswana, kubendana, mpe nyonso yankaka, ntangu ba ke mona Mpeve ya Nzambi kusala na kati-kati ya beno. Mpe ba ke meka, ba ke mekaka kubanda bamvula mingi, na kufina Yawu. Kasi kulutila ba ke meka na kufina Yawu, kulutila Yawu ke kuma nene. Beno lendaka ve kusinga yina Nzambi me sakumuna. Beno lenda kaka ve. Beno lenda kaka ve kusala yawu.

119 Na yawu, beno me mona, yina vwandaka bantu ya Nzambi. Ntangu yayi, profete yina, ata ti yandi vwandaka kuna mpe ntinu pesaka yandi kisalu, yandi vwandaka sala na kati ya bantu ya lukumu, mpe nionso yina. Mpe Ndinga ya Nzambi kwizaka na yandi. Yandi sosaka luzolo ya Nzambi, mpe luzolo ya Nzambi pesaka yandi mvutu, mpe tubaka, “Mu ke singa ve bantu yayi. Mu me sakumunaka bawu.”

120 Ntangu yayi ya kele ve na théologien na nsi ya mazulu yina lenda manga Nsangu yayi yina beto ke na kulonga, ti Yawu kele kieleka Ndinga ya Nzambi yina me kwisa na ntangu ya yawu. Nzambi ke na kusiamisa yawu na bima nionso yina ba me tuba to me sala, Yandi me siamisa ti Ya kele kieleka. Ntangu yayi, ya kele ata na théologien mosi ve, mutangi mosi ya Biblia, profete mosi ve, lenda tala na Ndinga yayi, kana yandi kele profete, yandi ke mona kima mutindu mosi. Kasi kana yandi mona ve kima ya mutindu mosi, yina ke lakisa ti ya kele na kima ya yimbi. Samu. . .

121 Beno ke tuba, “Mbote, oh, mu lendaka baka yawu mutindu yayi to yankaka.” Na yina Balak, Balaam. Beno me mona? Kasi Nzambi talisamaka na Moise.

Mpe na yina yinki vwandaka kidimbu? Ndinga ya Nzambi. Mpe yandi waka lukanu ya kieleka, ya kukondwa mvindu ya Nzambi, “Kukwenda ve. Kumeka ve ku—kusinga yina Mu me sakumuna. Bawu kele bantu ya Munu.”

Kasi beno zaba yinki? Balaam vwandaka ve mutindu bantu yina, na kubanda. Oh, wapi mutindu. . .Ba-Balaam yikwa kele

kuna na yinza bubu yayi! Yandi zolaka ve kimvuka yina, na kubanda.

<sup>122</sup> Ntangu yayi, na manima yandi me baka lukanu ya Nzambi ya kukondwa mvindu, “Kukwenda ve,” kasi, beno me mona, na kisika ya kusala yawu, ya vwandaka mutindu mosi na Cain, mutindu Koré, yandi vwandaka na musoki, mpe yandi—yandi zolaka, kikuma samu na kukwenda, na mutindu nionso.

<sup>123</sup> Beno tala, quartier général ya denomination ya yandi, vutulaka na yandi mvutu, ba tubaka, “Ve, mu ke kwikila ve ti mu ke kwenda kuna. Mu ke kwikila ve ti mu ke kuzwa kima ya kusala na bawu. Mu ke swana ve na bantu yina, samu ti bantu ya Nzambi me tuba na munu ti bawu kele bantu ya Yandi, mpe mu banza ve ti mu ke kwenda.” Kana yandi zolaka bikala na yawu!

Kasi, kuna na kati ya ntima ya yandi, yandi vwandaka mutindu bawu ve. Beno me mona? Bawu vwandaka ve ya kimvuka ya yandi. Mpe konso kima yina vwandaka ve na kati ya kimvuka ya yandi, “vwandaka mbote ve, na kubanda.” Beno me mona? Mpe yandi talaka bawu, yandi tubaka, “Ya vwandaka na bima ya boma yina bawu salaka. Ya kieleka Nzambi ya santu ke singa bantu ya mutindu yina. Ba kele—ba kele, ba me longukaka ve. Ba me longukaka ve mutindu beto. Ba vwandaka bantu ya mayele. Oh, bawu ke tubaka na kusadila Nzambi, kasi, beno tala bawu, yinki bawu kele? Nkonga ya, na yina, nkonga ya bampika, bantu yina ke balulaka poto-poto, yina ba-Egyptien basisaka kuna. Kasi, ata mbala mosi ve ti Nzambi zolaka vwanda na kima ya kusala na nkonga ya mvindu mutindu yina!”

<sup>124</sup> Yandi mangaka na kumona Ditadi yina ba bulaka mpe nioka yina ya kisengo, Dikunzi ya Tiya yina. Yandi mekaka na kuteza bawu landila bumuntu. Yandi zimbanaka na kumona lubokilu ya kulutula zulu ya Nzambi. Na nzila ya lemvo, na nzila ya kusoola, bawu vwandaka na ndonga yina, mpe na Ndinga ya Nzambi. Mpe ntangu yandi zolaka kusinga bawu, Nzambi tubaka, “Kusala yawu ve. Ba kele ya Munu. Bika bawu swi. Kusimba bawu ve.”

<sup>125</sup> Ntangu yayi, na yawu bakala balukaka, yandi kwendaka. Ntangu yayi beno tala quartier général ya yandi ya denomination, ti, na ntangu yandi kwendaka. Ba fidisaka kimvuka ya lukumu mingi. Na mbala yayi ba vwandaka mu banza, na kisika ya bandimi ya mpamba, mu banza ya vwandaka ba-docteur ya théologie kwisaka mbala yayi. Mu banza ya vwandaka ba-évêque, to mu banza ba-surveillant général, ti . . . Yandi fidisaka kimvuka ya mbote mingi, mpe mwa kimvuka ya lukumu mingi, muntu yina vwandaka mwa bandongosolo ya mingi mpe lendaka talisa yandi manaka na mutindu ya mbote mingi, lendaka kutalisa yawu na mutindu ya mbote.

<sup>126</sup> Beno me mona, yawu yina Cain salaka; yandi banzaka. Yawu yina Koré salaka; yandi banzaka. Ya kele ve yandi yina ke banzaka.

“Beto ke basisa mabanza.” Beto ke kwikila Nzambi, ata ti nionso yina muntu yankaka ke tuba. Beto ke kwikila Nzambi. Beto ke banza ve na yina Nzambi me tuba. Beno lendaka ve kubanza na Yawu. Beno fwana kundima Yawu na lukwikilu. Mpe konso kima yina beno zaba, beno fwana ve kubanza diaka. Mu zaba ve mutindu Yandi ke salaka yawu; mu ke kwikila kaka ti Yandi ke sala yawu. Mu zaba ve mutindu Yandi ke lungisa nsilulu yina; kasi Yandi tubaka ti Yandi ke sala yawu. Mu ke kwikila yawu. Mu ke ndima yawu na zulu ya lufulu ti mu ke kwikila ya kele Ndinga ya Nzambi.

Beno ke tuba, “Mbote, nge lenda ve kununga na kulutisa yawu.” Mu zaba ve mutindu mu ke lutisa yawu, kasi Yandi tubaka, “Tuba yawu.”

Mu ke bambuka moyo ti pasteur ya munu ya Baptiste tubaka na munu, yandi tubaka, “Kasi, Billy, nge ke longa na makunzi ya dibuundu. Samu na yinki, nge banza ti muntu mosi lenda kuwa kima ya mutindu yina?”

Mu tubaka, “Nzambi me tuba mutindu yina.”

“Yinki mutindu nge ke sala yawu, nge yina me kotaka kaka na lukolo ya bana, kusambila samu na bantinu, mpe kulonga na yinza ya muvimba?”

<sup>127</sup> Mu tubaka, “Mu zaba ve mutindu mu ke sala yawu, kasi, Yandi tubaka mutindu yina, mpe ya kele kaka mbote mingi samu na munu.” Beno me mona? “Yandi tubaka mutindu yina. Mu zaba ve wapi mutindu ya ke salama.”

Yandi tubaka, “Nge ke banza ti bantu ya yinza yayi me longukaka mingi, yina nge ke bendana na bawu, na zulu ya dilongi yayi ya kubeluka ya Kinzambi mpe nionso yina, nge ke banza ti bawu ke kwikila yawu?”

<sup>128</sup> Mu tubaka, “Ya kele ve kisalalu ya munu na kuzaba kana bawu ke kwikila Yawu to ve.” Mu tubaka, “Kisalalu ya munu kele kulonga Yawu. Yawu yina Yandi tubaka na munu. Yandi tubaka ti Yandi ke vwanda na munu, mpe Yandi me tuba na munu yina yawu ke sala.”

Mpe yawu me salama kaka kieleka mutindu Yandi tubaka ti ya ke salama. “Ntete, simba diboko ya bawu; na manima ya ke salama ti nge ke zaba kinsweki ya ntima ya bawu.” Mpe mu tubaka yawu na beno, mpe ya me salama mutindu yina. Wapi mutindu ya ke salaka yawu? Mu zaba kaka ve yinki mutindu ya ke salaka yawu. Ya kele ve dyambu ya munu na kuzaba mutindu ya ke salama; ya ke salama kaka.

<sup>129</sup> Nani lendaka tendula ntangu Nzambi tubaka na Elie, “Mata kuna mpe vwanda na zulu ya mongo, mpe Mu ke pesa na nge

madia. Mu me tuma bangoy-ngoy na kudisa nge”? Wapi mutindu ngoy-ngoy lendaka baka kitini ya dimpa mpe kitini ya mbisi, ya kulamba, mpe kunata yawu na profete? Ya kele na zulu ya kima nionso mu lendaka tendula. Mu banza ve ti beno lenda to, to muntu mosi ve lenda. Kasi Yandi salaka yawu. Yawu yina vwandaka mfunu. Yandi salaka yawu, mpe ya kele kieleka ti Yandi salaka yawu.

Wapi mutindu Yandi salaka yawu, mu zaba ve; ya kele ve kisalu ya munu. Kasi Yandi salaka yawu. Mutindu Yandi salaka ntoto, mu zaba ve; kasi Yandi salaka yawu. Wapi mutindu Yandi fidisaka Mwana ya Yandi, mu zaba ve; kasi Yandi salaka yawu. Mutindu Yandi vumbukaka na lufwa, mu zaba ve; kasi Yandi salaka yawu. Wapi mutindu Yandi me vulusa munu? Mu zaba ve; kasi Yandi salaka yawu. Ya kieleka. Wapi mutindu Yandi me vulusa beno? Mu lendaka ve kutuba na beno; kasi Yandi me sala yawu. Wapi mutindu Yandi me belusa munu? Mu zaba ve; kasi Yandi me sala yawu. Yandi silaka ti Yandi ke sala yawu, mpe Yandi ke zitisaka Ndinga ya Yandi.

Ntangu yayi, Balaam zolaka zaba yawu, mpe yandi vwandaka zaba yawu mbote.

<sup>130</sup> Beno tala, kimvuka yayi ya mbote mingi, ya lukumu, kwisaka, mpe wapi kisika yandi vwandaka mbote mingi? Ba vwandaka na makabu ya mbote mingi. Mpe yina kaka ve, bawu lendaka pesa yandi mbongo mingi, mpe bawu lendaka, kupesa yandi kisika ya kulutila mbote. “Ntangu yayi, na nganda ya kuvwanda longi mpamba na kati ya organisation, beto ke kumisa nge mukengi ya kizunga. Beno me mona? Ti, beto ke—beto ke sala kima mosi samu na nge kana nge lenda basisa kaka nkonga ya bantu yina kuna, beno me mona, mpe nge sukisa yawu.” Oh, bawu pesaka yandi kisika mosi ya nene. Yandi tubaka, “Kulutila nge ke sakumuna . . .” Yandi tubaka, “Nge zaba, mu kele na kiyeka ya kumatisa nge na kisika ya zulu.” Beno tala kisika yandi ke bakaka bandinga ya yandi, na mfumu ya yinsi.

<sup>131</sup> Wapi kisika Moïse vwandaka baka Badinga ya yandi? Na Ntinu ya Mazulu. Mosi vwandaka Ndinga ya nsilulu ya Nzambi, “Mu ke nata beno na yinsi ya nsilulu, mpe ata muntu mosi ve ke telema na ntwala ya beno. Mu ke fidisa ba-frelon na ntwala ya beno mpe Mu ke bengana bawu, na bisika nionso. Mpe beno ke baka yinsi. Mu me si- . . . Mu me pesa yawu dezia na beno. Beno kwenda, beno baka yawu, beno baka yawu; ya kele ya beno.” Mpe ntangu yayi, beno me mona, ya kele Yina Moïse vwanda kuwa. Mpe bakala yayi vwandaka kuwa tii kuna ya kumaka na kima mosi na ntima ya yandi ti yandi vwandaka na musoki, mpe na yawu yandi kwendaka na mfumu ya yandi ya dibuundu. Beno me mona?

<sup>132</sup> Beno tala, kisika ya kulutila mbote. Yandi tubaka, “Nge zaba ti mu ke na kiyeka ya kupesa nge kisika ya zulu? Mu ke pesa nge

kisika ya kulutila mbote. Mu ke sala mingi samu na beno. Mu ke matisa lufutu ya nge. Mu ke matisa salaire ya nge.” Mpe ntangu yandi pesaka yandi nionso yayi, yawu fwaka yandi meso.

<sup>133</sup> Ba-Balaam yikwa kele na yinza bubu yayi, ti, na nzila ya kisika ya kulutila mbote, nsilulu ya kima mosi! Ntangu muntu me zibula meso ya yandi na Ndinga mpe bisalu ya Nzambi. . . Mpe bakala yayi ya mbote, yina kele na lukumu, ke banda mutindu kisadi ya Nzambi, mpe yandi kusungika dibuundu mosi ya mbote. Na manima ya mwa ntangu fioti, mbotika ya Mpeve-Santu me monana na yandi; mbotika na Nkumbu ya Yesu me talisama na yandi, yina kele Masonuku mpe mutindu mosi kaka ya Masonuku samu na kubotika. Mpe ntangu ba ke talisa yawu na yandi, mpe ti denomination zaba ti bawu ke zimbisa yandi ntangu yandi ke banda yawu, ba ke pesa yandi kisika ya kulutila mbote mpe ke fidisa yandi na dibuundu yankaka. Beno me mona, malongi ya ntama ya Balaam, dyaka, kieleka kaka mutindu ya vwandaka na mbandukulu.

<sup>134</sup> Ntangu yayi, muntu yina ke tangaka Biblia yango, yandi lenda ve kutanga Yawu kukondwa kumona ti ya kele Kieleka. Ya kele na muntu ve yina me bakaka mbotika ke sadilaka bisalu “Tata, Mwana, Mpeve-Santu.” Ya kele credo ya Katolika mpe ya kele ve malongi ya Biblia. Muntu ve na kati ya Biblia bakaka mbotika, to bamvula nkama tatu na manima ya lufwa ya ntumwa ya nsuka, kasi yina ba botikaka na Nkumbu ya Yesu Klisto. Dibundu ya Katolika bandaka yawu, mpe bayankaka me ndima yawu. Mpe longi nyonso yina kele ya kuvwanda na kati ya bureau ya yandi mpe ke tala yawu, zaba ti ya kele Kieleka, Kasi samu na kuzabana, samu na kukeba kisika ya yandi, samu ba zitisa yandi mbote na kati ya bantu, yandi ke kakula.

“Mbote,” beno ke tuba, “Nzambi me sakumunaka yandi.”

<sup>135</sup> Kieleka, bayankaka na kati ya bawu kele na makabu ya kubeluka ya nzutu, bayankaka na kati ya bawu kele na ba-campagne ya nene. Mpe samu na bawu ya kele mutindu mbata, mpe bawu ke bakaka mvutu ya mutindu mosi na Ndinga ya Nzambi ti beno to muntu nyonso yankaka lendaka kuzwa; Nzambi ke sobaka ve. Beno me mona yina mu zola tuba?

<sup>136</sup> Balaam, samu na kisika ya kulutila mbote, yandi banzaka. Ntangu yayi beno tala, ntangu kimvuka yina ya kitoko mingi vutukaka, kieleka. . . Balaam, kuna, tekisaka dilongi ya kimuntu. Beno me mona? Yandi tubaka. . . Kimvuka ya kulutila kitoko vutukaka, yandi—yandi zolaka tuba, “Beni katuka na ntuala ya munu! Mu tubaka na beno Ndinga ya Nzambi. Beni kwenda! Yayi kele MUTINDU ME TUBA MFUMU.” Kasi, beno me mona, makabu, mpe kuvwanda muntu ya kuzabana mingi!

<sup>137</sup> Oh, wapi mutindu bawu ke sala yawu! “Beto ke fidisa nge na yinza ya muvimba. Beto ke pesa nge avion ya kuswaswana. Beto



ke simbisa balukutakanu ya nge bisika nionso kana nge ke...”  
Oh, ve. Uh-huh. Beno me mona?

Beto zaba yina Ndinga ke tuba. Beto zaba yina Nzambi tubaka. Beto ke kangama na yawu, na lusalusu ya Nzambi. Beno me mona? Ata ti mutindu ya nsilulu, mpe wapi mutindu ya mbongo ya zulu beno lenda futa, mpe yikwa *yayi*, *yina*, to *yankaka* beno lenda—beno lenda basisa; beto zola MUTINDU ME TUBA MFUMU, mpe yina Yandi tubaka *Awa* ntete.

“Mbote, dibuundu tubaka, ‘Ya kele na nzila ya zole.’”

Beto zola yina Nzambi tubaka na mbandukulu. “Mpe kubwela na Yawu to kukatula na Yawu, ata mpe nkumbu ya beno ke katula na Buku ya Luzingu; samu na kubwela ndinga mosi na Yawu, to kukatula Ndinga mosi na Yawu.” Beto zola yina Yandi tubaka; ya kele ve yina dibuundu me tuba, yina Docteur Jones tubaka, yina muntu yankaka tubaka. Beto zola yina MUTINDU ME TUBA MFUMU me tuba, yina Ndinga me tuba.

<sup>138</sup> Kasi ntangu yayi beto ke mona Balaam, kisadi ya Nzambi. Mpe mingi na kati ya bantu yina ke kubanda, mpe tumama na Nzambi, ba ke samunaka Ndinga ya Nzambi na bima mingi; kasi ntangu ya ke kuma na Kieleka ya muvimba, ba ke sala yawu ve.

<sup>139</sup> Beno tala awa, mutindu profete ya Nzambi, ba zolaka kukuta yandi ve na kati ya nkonga ya mutindu yina, na kubanda. Yandi zolaka ve kukwenda na bawu. Kasi, beno tala mbote, samu na kuzabana mingi, beno me mona, samu na kusepelisa konsiansi ya yandi, yandi tubaka, “Mbote, kuvwanda mpimpa nyonso awa, mpe mu ke meka dyaka.” Beno me mona, “Mu ke meka dyaka?” Samu na yinki beno zola kumeka dyaka?

<sup>140</sup> Nzambi tubaka na yandi ntete yina ya kutuba. Nzambi tubaka, “Tuba na bawu ti nge ke kwenda ve.” Yawu yina kele Ndinga ya Yandi ya kisina. “Mu ke kwenda ve. ‘Mpe nge kwenda ve. Nge ke singa ve yina Mu sakumunaka.’” Ntangu yayi beno tala mbote mutindu yawu vutukilaka yandi, na manima ya mwa ntangu fioti. Beno me mona? Mpe yawu ke salama, konso ntangu. Ntangu Nzambi me tuba kima mosi, Yandi ke zola kutuba yawu. Yandi ke sobaka ve dibanza ya Yandi samu na yawu. Yandi ke kangama kaka na Ndinga ya Yandi. Ata nionso yina muntu yankaka ke tuba, Yandi ke kangama kaka na Ndinga yayi.

<sup>141</sup> Ntangu yayi, Balaam zolaka zaba mbote wapi kisika ya kutelama. Yandi zolaka kwenda ntama ya bantu yayi. Kasi makabu nionso ya mbote mpe nsilulu ya ntinu yayi, yandi tubaka, “Nge zaba ti mu lenda sala yawu. Mu kele évêque. Mu lenda sala nionso yina mu zola, mpe mu ke pesa nge kisika ya zulu kana nge me kwisa kusala yawu samu na munu.”

Mpe Nzambi tubaka na yandi, “Kusala yawu ve.”

<sup>142</sup> Kasi Balaam tubaka dyaka, “Nge, vwanda mpimpa ya muvimba awa, mpe mu ke—mu ke meka dyaka.”

Beno me mona, yandi vwandaka na Ndinga. Nge ke swana diaka ve samu na Yawu. Nzambi tubaka mutindu yina. Na kimvuka ya mutindu yina, bawu ke tubaka na beno ntangu nionso ti beno kele na nganda ya luzolo ya Nzambi, kana beno me bika bawu.

<sup>143</sup> Kilumbu mosi, ya vwandaka na kimvuka mosi kwisaka na profete mosi, na nkumbu ya Job. Bawu lendaka ve kundimisa yandi. Yandi monaka vision. Yandi zabaka yina vwandaka kieleka.

Balaam monaka vision, mpe kasi yandi kangamaka ve na Yawu.

<sup>144</sup> Ata yinki mutindu dibuundu ya yandi vwandaka tuba, “Oh, Job, nge lendaka sala diambu *yayi*, nge lenda sala *yina*.” Ata kento ya yandi, yandi tubaka, “Nge ke tuba mutindu muntu ya bulawu.” Beno me mona? “Mu zaba yina Mfumu tubaka. Mu zaba yina Yandi lombaka, mpe yawu yina mu salaka.” Beno me mona, yandi vwandaka na yina Nzambi tubaka na yandi.

<sup>145</sup> Beno tala, Balaam yina tekisaka dilongi yayi ya kimuntu samu na konsiansi ya yandi. Beno me mona? Yandi tubaka, “Mbote, mu ke—mu ke tala yina kele. Mu ke meka diaka.” Ntangu yayi, ya kele kisika yina beno ke baka, nzila ya zole. Ba-Balaam yikwa kele na kati ya beto na nkokila yayi, yina ke zolaka kusadila Matthieu 28:19 muntu dilongi ya kimuntu kaka samu na kusepelisa konsiansi ya bawu? Bantu yikwa zola sadila Malachie 4 samu na kusepelisa konsiansi ya bawu? Bantu yikwa zola baka Luc 17:30 kaka samu na kusepelisa konsiansi ya bawu? Bantu yikwa zola sadila bima yayi, ntete, “Mbote, mu ke tuba na beno, mu—mu banza ti yawu me vwalangana samu na Yawu?”

<sup>146</sup> Mpe kuna awa vwandaka na Balaam vwanda meka na kutuba, “Mu banza ti Nzambi me vwalangana. Mu ke meka diaka, beno me mona, beno me mona yina Yandi tubaka.” Ntangu yayi, Yandi zaba ntima ya beno. Beno tala, Balaam sadilaka dilongi yayi ya kimuntu samu na kusepelisa konsiansi ya yandi, samu, na yina, yandi zolaka mbongo yina. Yandi zolaka lukumu yina. Yandi zolaka yawu. Yandi zolaka kisalu yina. Yandi zolaka kisika yina, samu ba vwanda na luzitu na ntuala ya yandi, Docteur *Kingandi*. Na yina yandi—yandi tubaka, “Mu ke meka diaka.”

<sup>147</sup> Oh, na ba-Balaam na kati ya yinza na nkokila yayi, na bayina ba silaka bisika, kuzabana! Oh, la la! Bawu ke lembika konsiansi ya bawu na nzila ya bima yayi. Samu na ba-denomination ya bawu, bawu ke tuba, “Kana nge sala *yayi*, nge ke vwanda na nganda. Mu zaba ti nge kele muntu ya mbote, mpe beto zola nge,” mpe yandi kele muntu ya mbote, “beto zola nge. Kasi nge lenda ve kulonga yawu. Malongi ya beto—ya beto ke tuba ti beno lenda sala yawu ve. Docteur *Kingandi* tubaka ti ya kele mutindu yina. Ntangu yayi nge fwana kwikila yawu mutindu yayi, kana

nge ke vwanda na beto. Ntangu yayi, kana beno zola, mu zaba ti beno me kuzwa ntangu mosi ya mpasi, mbote, mu ke tala kana mu lenda ve kupesa nge kisika ya zulu, mu banza kufidisa nge na dibuundu yankaka.” Oh, nge Balaam! Ntangu beno me zaba luzolo ya Nzambi, beno sadila yawu! Nzambi ke sobaka ve dibanza ya Yandi. Ve.

<sup>148</sup> Kima yina ke sala ti yandi bika Kieleka, kele, samu na lutumu ya yandi. Yandi tubaka, “Mbote, mu ke—mu ke meka dyaka.” Beno tala ba-Balaam yina kele.

<sup>149</sup> Na yina beno bambuka moyo, ntangu yandi kwisaka na mpimpa ya zole, na lukumu yayi ya nene, dezia konsiansi ya yandi fulukaka mpe lembamaka, Nzambi bikaka yandi kwenda. Ntangu yayi, Nzambi me sobaka ata fioti ve dibanza ya Yandi, kasi Yandi pesaka yandi muswa na ndinga ya Yandi. “Kwenda na ntwala.” Kasi yandi monaka ti ya ke simba ve.

<sup>150</sup> Nzambi zabaka yina vwandaka na kati ya ntima ya Balaam. Ata ti yandi vwandaka profete, Yandi zabaka ti yandi vwandaka yina ba-exalté yayi, mpe yandi—mpe yandi kaka . . . yandi—yandi zolaka kusinga bawu, na mutindu nionso. Mpe Nzambi tubaka na yandi na kusala yawu ve, kasi dyaka yandi kwizaka, zolaka kusala yawu, dyaka, na yina Nzambi bikaka yandi kukwenda na ntwala. Nzambi tubaka, “Kwenda na ntwala.” Ntangu yayi, beno bambuka moyo, ata mbala mosi ve ti Yandi me sobaka dibanza ya Yandi.

<sup>151</sup> Beno tala, ya vwandaka nsatu ya yandi na kusinga bawu. Bantu yina ya vwandaka baka mutindu bafanatiki, yandi zolaka kusinga bawu. Yandi vwandaka na nsatu ya kisika mosi. Yandi zolaka ve kulutisa ntangu na bawu, na yina yandi tubaka kana yandi lendaka sala diambu yayi samu na ntinu, na yina yandi zolaka baka kisika ya zulu. Nzambi sobaka ata fioti ve mabanza na Yandi to Ndinga ya Yandi.

Kasi Yandi ke pesa beno nsatu ya ntima ya yandi, ya ntima ya beno. Yandi silaka yawu. Beno zaba yawu? Yandi silaka na kupesa beno nsatu ya ntima ya beno. Mpe bika ti nsatu ya beno kuvwanda Ndinga ya Nzambi. Bika ti nsatu ya beno kuvwanda luzolo ya Yandi, ata fioti ve luzolo ya beno mosi. Luzolo ya Yandi! Kana Yandi . . . Nge lomba Yandi kima mosi, Yandi ke pesa yawu ve na nge, tuba, “Matondo na Nge, Mfumu. Nge zaba yina kele mbote.”

<sup>152</sup> Beno tala mpe Ntinu Ézéchiás, ntangu Yandi fidisaka profete yina kuna na yandi, Nzambi salaka yawu, mpe tubaka, “Sungika yinzo ya nge. Nge ke kufwa.”

Ézéchiás balulaka kizizi ya yandi na kibaka mpe dilaka na mawa, mpe tubaka, “Mfumu Nzambi, mu—mu ke lomba na Nge na kutala munu. Mu me tambula na ntwala ya Nge na ntima ya kulunga. Mu zola ti Nge pesa munu bamvula kumi na tanu diaka.”

153 “Mbote mingi.” Nzambi zonzaka na profete, tubaka, “Vutuka mpe tuba na yandi ti mu me kuwa yandi.”

Mpe yinki yandi salaka? Yandi nataka nsoni na yinsi ya muvimba. Nganzi ya Nzambi kulumukaka na zulu ya yandi ti Yandi zolaka kufwa yandi. Ya kele kieleka. Beno zaba yawu. Yandi vutukaka na manima na ntwala ya Nzambi. Ya zolaka vwanda kitoko mingi, samu na yinsi, samu na ntinu, mpe bantu, ti yandi kwenda, kana yandi zolaka landila na kukwenda mpe na kundimaka kima ya ntete yina Nzambi yidikaka samu na yandi.

Kasi yawu vwandaka wakana mpasi samu na profete, ntangu profete zolaka vutuka mpe kuzonza Ndinga ya Nzambi na yandi, na manima yandi me tuba na yandi. Kasi Nzambi tubaka, “Kwenda na ntwala.” Kasi, beno me mona, ya nataka nsoni.

154 Yinki Balaam salaka? Na manima ya kuzaba luzolo ya Nzambi, mpe kasi yandi tatamanaka, yandi zolaka sala yawu, na mutindu nyonso. Mpe yinki yawu salaka? Beno tala. Yandi sobaka ata fioti ve dibanza ya Yandi. Yandi zabaka yina vwandaka na kati ya ntima na yandi.

155 Beno zaba, Thomas, kilumbu mosi yandi lendaka kaka ve kukwikila yawu. Ve, yandi—yandi tubaka, “Ve, mu lenda kwikila yawu ve. Kana mu lenda baka diboko ya munu mpe kutula yawu na lweka ya Yandi, kutula yawu bisika vwandaka bansonso ya diboko ya Yandi, mbote, na yina, na yina mu ke—mu ke kwikila yawu.”

Yandi tubaka, “Kwisa awa, Thomas. Beno me mona? Ntangu yayi tula maboko ya nge na kati awa.”

Ntangu yayi, oh, Thomas tubaka awa, “Ya kele Mfumu ya munu mpe Nzambi ya munu.”

156 Yandi tubaka, “Yinga, nge me mona, mpe ntangu yayi nge me kwikila yawu. Wapi mutindu nene kele musendo ya bawu, yina me monaka ata fioti ve mpe kasi me kwikila!”

Bantu bantangu yankaka ke kuzwa Mpeve-Santu ve kana ti bawu kuzonza na bandinga. Mu ke kwikilaka na kuzonza bandinga ya malu-malu, kieleka. Yandi kele Nzambi ya mbote; Yandi ke pesa beno nsatu ya ntima ya beno. Kasi ata ti beno ke zonza na bandinga, mpe ke manga Ndinga yayi, beno kele kaka na kifu. Beno me mona? Beno me mona, beno ke kota ve na kuzonzaka bandinga ya malu-malu. Beno ke kota na kuzitisaka konso Ndinga. Ya kele nzikisa ya Mpeve-Santu, ntangu beno ke kwikila Ndinga ya Nzambi. Beno me mona?

157 Mu ke kwikilaka na kuzonza bandinga ya malu-malu. Mu banza ti beno lenda kindisama, mutindu mu tubaka na suka yayi, tii kuna beno ke tuba bandinga ya malu-malu. Mu me salaka yawu, munu mosi, mpe mu zaba ti ya kele Kieleka. Mu zaba ti ya kele kieleka. Kasi yina kele kidimbu ve, beno, ti beno kele

mwana ya Nzambi yina ba soolaka. Beno me mona? Ve, ata fioti ve. Yandi tubaka ata fioti ve . . .

“Bantu mingi ke kwisa na Munu mpe ke tuba, ‘Mfumu, mu pesaka profesu ve mpe mu salaka ve bima yayi nionso ya nene na Nkumbu ya Nge?’ Yandi ke tuba, ‘Kwenda ntama na Munu, nge yina ke salaka disumu ya nkú, mu zabaka nge ata fioti ve.’”

<sup>158</sup> Beno ke zonzaka na bandinga mpe na yina ke manga na kubaka mbotika na Nkumbu ya Yesu Klisto? Kima mosi ke tambula mbote ve kisika mosi kuna. Yinga, ya kieleka; bima yina nionso, bantumunu yayi Nzambi me pesa. Kima mosi ke tambula mbote ve. Beno sosa kaka konsiansi ya beno mosi, mpe beno tala yina—kumona yina Biblia ke tuba. Beno talisa na munu kisika muntu botamaka na nkumbu ya “Tata, Mwana, Mpeve-Santu.” Beno me mona? Ya ke kuna ve. Kasi, beno me mona, na bantangu yankaka samu na konsiansi ya beno, beno ke tuba, “Mbote . . .”

Beno ke tuba, “Nzambi ke zonzaka na bakento wapi mutindu bawu fwana sala, kulwata ve bakupe mpe nyonso, kasi, beno zaba, pasteur tubaka . . .” Na yina bawu ke baka nzila ya kukondwa mpasi.

<sup>159</sup> Bawu zaba yina Nzambi tubaka samu na yawu Awa. Beno me mona? Kieleka, Nzambi tubaka mutindu yina.

Na yina bawu—bawu—bawu zola kusala yawu, na mutindu nyonso, beno me mona. Bawu ke meka na kuzwa esikize. “Mbote, mu banza ti ya kele mingi mbote. Ya kele—ya kele ve . . . Mupepe ke bulaka ve . . .” Yinga.

Kasi Nzambi tubaka na bakala na kulwata ya kuswaswana na kento. “Kana kento lwata lele yina kele ya bakala, ya vwanaka busafu na meso ya Yandi.” Na yina ya kele mbote ve, yinga, mpe beno fwana ve kusala yawu. Ve. Beno me mona? Na yina, kuna, ya kele yimbi.

<sup>160</sup> Kasi, beno me mona, bawu ke meka na kuzwa esikize, ti, “Mfumu me tuba na munu na kusala yawu.” Mu ke tuba ve ti Yandi me tuba yawu ve, kasi, beno tala, ya kele ve luzolo ya Yandi ya kulunga. Ya fwana vwanaka muswa ya Yandi. Beno me mona tina ya ke sala? Yawu ke sambukila kimvuka ya muvimba. Yawu sambukilaka camp ya muvimba.

<sup>161</sup> Beno tala awa, ata mbala mosi ve ti Nzambi me sobaka dibanza ya Yandi, Ndinga ya Yandi. Kasi Yandi kele Nzambi ya mbote, mpe Yandi ke pesa beno nsatu ya ntima ya beno, ata ti yawu ke telemina luzolo ya Yandi. Beno ke kwikila yawu?

Beno tala, Nzambi tubaka na Moïse, “Kwenda kuna,” profete yayi ya kupakulama. Yandi tubaka, “Kwenda kuna mpe tuba na ditadi yina.” Ba me bula yawu dezia.

<sup>162</sup> Moïse kwendaka kuna na nganzi ya yandi, yandi bakaka nkawa, mpe tubaka, “Beno bimpumbulu, beto fwana basisa masa na ditadi yayi?” mpe yandi bulaka ditadi. Masa vwanaka

kwisa ve. Yandi bulaka yawu diaka; ya kwisaka. Ya vwandaka yina me telemina luzolo ya Nzambi. Yawu bukaka manaka nionso na kati ya Biblia; ba fwana bula Klisto mbala zole. Beno me mona? Ba bulaka Klisto mbala mosi. Yawu bukaka manaka nionso. Kasi Yandi pesaka yandi muswa ya Yandi. Na yina, na manima, yandi tubaka, “Beno me mona, beto ke pesa beno masa. Yinga, mu me basisa yawu samu na beno, beno nkonga ya bimpumbulu!”

<sup>163</sup> Nzambi tubaka, “Kwisa awa, Moïse. Kwisa awa. Mata kuna na zulu. . . Nge vwandaka kisadi ya kwikama.” (Mutindu kento yina na zulu ya yintu, “Nge mataka,” beno me mona.) “Tala ntama kuna. Nge me mona yinsi ya nsilulu?”

“O Mfumu!”

“Kasi nge ke kota ve. Nge bakaka muswa ya Munu, kuna na Ditadi. Nge me kuzwa nkembo nge mosi, beno me mona, mpe Munu ve. Nge me kukisantisa nge mosi. Nge me santisa Munu ve. Nge zitisaka ve Ndinga ya Munu ya kisina, yina Mu tubaka na nge na kusala.” Kasi, masa basikaka.

Beno lenda tentika maboko na zulu ya bambevo mpe bawu ke beluka. Beno lenda pesa profesi, to kuzonza bandinga. Kasi, kima kele, beno zitisa Ndinga ya Yandi ya kisina! Nzambi ke sobaka ve dibanza ya Yandi, nkundi. Beno fwana zitisa lutumu ya Yandi, luzolo ya Yandi.

“Oh, mbote, yina vwandaka samu na bilandi.”

<sup>164</sup> Yandi ke sobaka ve. Kana Yandi kele dyaka na kilandi, ya kele lutumu ya mutindu mosi. “Beno kwenda na yinza ya muvimba mpe beno longi Nsangu ya mbote. Bidimbu yayi ke landa bayina ke kwikila.” Ata mbala mosi ve ti ya ke soba. Yandi lenda soba ve.

Ntangu yayi, beno lenda tuba, “Mbote, mu ke tuba na beno, ya kele ve samu na kilumbu yayi.” Oh, beno ba-Balaamite! Beno me mona? Beno me mona, Nzambi ke sobaka ve. Yandi kele mutindu mosi mazono, bubu yayi, mpe kukonda nsuka.

<sup>165</sup> Beno tala kaka ba-Balaamite bubu yayi. “Oh, mu zaba, na kati ya Biblia ba botikaka bawu na Nkumbu ya Yesu, kasi, beno tala, bantu nionso. . .”

Mu ke kipe ve yina bantu me sala. “Ya kele ve na Nkumbu yankaka na yisi ya Mazulu yina pesamaka na kati-kati ya bantu samu ti beno kuzwa mpulusu.” “Ya kele ve na mulemvo ya disumu, na nganda ya Nkumbu ya Yesu Klisto.” Na yina, wapi mutindu mbote beno kele, yina beno ke sala, yina ke sala kima mosi ve. Ya kele Ndinga ya Nzambi ya kisina; beno fwana vwanda na Yawu. Fiou! Mbote mingi.

<sup>166</sup> “Kutumama na Ndinga ya Yandi kele mbote mingi kulutila munkayulu.” Beno ke bambuka moyo na ntangu yina Saül kwisaka vutuka.

167 Balaam vwandaka na dikabu ya lukwikilu mpe lendaka sadila yawu na mutindu ya kulunga, Ndinga ya kieleka ya Nzambi.

Bantu mingi kele na kilanga ya kisasu bubu yayi, na makabu ya kubeluka ya nzutu, lenda sala kima mutindu mosi. Bantu mingi awa, bantu ke zonzaka na bandinga ya malu-malu, bantu ke pesaka profesi, yina kele na dikabu mosi, lenda sadila yawu samu na Kimfumu ya Nzambi, kasi bawu ke sala yawu ve. Bawu ke baka . . . Mpe Nzambi ke sakumuna bawu, kaka, bawu ke baka muswa. Kasi samu na kuzabana, mpe biese, bandandu ya bawu mosi, ba me tekisa muswa ya bawu ya bukuluntu, mutindu Esaü salaka, beno me mona, tekisaka yawu na organisation. Tekisaka yawu, mutindu Balaam salaka. Beno me mona?

Bantu mingi ke na kusalaka kima mutindu mosi bubu yayi. Beto zaba ti ya kele kieleka. Ba ke tekisa bukuluntu ya bawu. Huh! Bakento ke tuba ti bawu kele na Mpeve-Santu, ke lwata bakupe; babakala ke pesa bawu muswa ya kumata na chaire, bakento ya bansuki ya kuzenga na chaire; kizizi ya kupakula, na mvwatu ya misambidi. Ditadi ya nene ya sakuba yina dibuundu me kuzwaka ntete ve.

168 Kana beno zola zaba, na bangolo ya politiki, yinki ntangu ya kele na nsungi ya kimfumu, beno me mona kisika ba-Juif kele. Beno tala mbote mutindu ba-Juif kele, samu ti bawu kele yinsi mosi. Kana beno zola kuzaba kisika bayinsi kele, beno tala ba-Juif.

Kana beno zola kuzaba kisika dibuundu kele, beno tala bakento. Beno tala mbote bumuntu na kati ya bakento, samu yandi ke kifwanikusu ya dibuundu. Ntangu beno ke mona kubeba na kati ya bakento, beno ke mona kubeba na kati ya dibuundu. Yina ya me kuma, Jézabel yina me pakula, kieleka kaka yina dibuundu me kuma. Beno me mona? Ntangu yayi, ya kele kieleka, mpe beno zaba yawu. Beno me mona? Kana beno zola kuzaba kisika dibuundu kele, beno tala mbote bumuntu na kati ya bakento ya beno. Samu, yandi kele, dibuundu kele kento.

Kana beno zola zaba mutindu ya yinsi, beno tala ba-Juif.

169 Beno tala, mutindu Nzambi tubaka na Balaam, na manima yandi kuwaka lukanu ya kieleka, Ndinga, “Kukwenda ve.” Yinga, na yina Yandi tubaka na yandi, na manima Yandi monaka na kati ya ntima ya yandi—ya yandi, yina ya zolaka sala; Yandi pesaka yandi muswa ya Yandi, na yina Yandi tubaka, “Kwenda.”

170 Mpe beno lenda sala kima mutindu mosi. Kana beno zola ve kutambula na Kieleka, beno lenda kwenda mpe kuzwa—kuzwa ministere ya nene. Ya kieleka, beno lenda sala yawu. Kasi nge ke na kubaka muswa ya Yandi. Nge ke na kutambula na zulu ya Ndinga ya Yandi. Yandi ke tomisa nge, ya kieleka. . . .

Kaka mutindu Yandi salaka na Balaam. Yandi vwandaka na lunungu, kasi yandi lendaka ve kusinga bantu yina. Yandi

lendaka ve kusala yawu. Samu ti, ntangu nyonso yandi bandaka na kusinga, yandi sakumunaka. Beno me mona, yandi lendaka ve kusala yawu. Kasi kisika yandi nungaka lukanu ya yandi ya nene, yandi longaka bantu yayi, na nzila ya Balak, na kusala kindumba. Yandi kwendaka na camp ya Israel mpe pusaka bawu na kukwelana, yandi tubaka, “Beto tala, beto nionso kele mosi. Na yina, beno ke sambilaka Nzambi mosi. Beto kele na profete awa, mpe beno kele na profete kuna. Mpe beto ke na munkayulu ya mutindu mosi, Yehowa yina mosi mutindu batata ya beto. Ntangu yayi, samu na yinki ve beno nionso ke kwisa kaka mpe beno kwisa vukana na beto?”

Biblia ke tuba, “Beno vukana ve na bantu yina ke kwikilaka ve. Beno vwanda ve na nsi ya kizitu mosi na bawu, ata fyoti ve. Kana bawu ke kwikila Yawu ve, beno vwanda ntama na bawu.” Beno me mona? “Beno basika, beno kabwana,” me tuba Mfumu, “mpe Mu ke yamba nge.” Beno me mona? “Beno simba ve bima ya bawu ya mvindu.” Ya kele kieleka. Mvindu ya bawu yina me telemina Ndinga, mpe bima mutindu yina, kuvwanda ntama na yawu. Beno kuwa yawu ve.

<sup>171</sup> Mpe awa beto talaka ti Balaam vwandaka kuna mpe yandi bandaka na kulonga bantu, mpe yandi vwandaka na kifu. Mpe yandi—yandi landaka nzila ya Balaam, mutindu yandi salaka, mpe longaka Balak, mpe bana ya Israël salaka kindumba. Mpe mpasi bulaka yinsi ya Israel, bantu, mpe mafunda ya bawu kufwaka na kilumbu mosi.

Mpe ntangu ba vwandaka bawu nionso kuna, na ntwala ya autel ya Nzambi, ke sambila, awa kwisaka bakala mosi ya Israélite na kento mosi ya Madianite, kento ya denomination, mpe me kota na kati ya tenta. Mpe mwana ya nganga-Nzambi ya bakala kwendaka kuna, mpe bakaka dionga mpe yandi kufwaka bawu zole. Mpe yina lembikaka nganzi ya Nzambi. Beno zaba ti ya kele Masonuku. Ya kieleka? Beno me mona?

<sup>172</sup> Kasi yinki salamaka? Balaam, yandi nungaka na kulembisaka Israël. Yinki yandi salaka? Yandi lembisaka camp ya bawu. Nzambi bikaka yandi kwenda mpe lembisaka camp ya bawu, mpe yandi sambukilaka camp ya muvimba.

Mpe ntangu mwa malongi ke banda, yina kele ve Kieleka ya Biblia, yawu ke sambukila camp ya muvimba. Muntu ke telama na dibanza ya kuswaswana, mutindu Koré, mpe tubaka, “Mbote, *yayi, yina*, mpe *yankaka*, mpe mu ke na dibanza ya kuswaswana,” ya ke sambukila camp ya muvimba. Mpe yawu yina me salama na dibuundu ya muvimba bubu yayi. Ya kieleka.

<sup>173</sup> Na kulongaka mutindu yandi salaka, yawu lembisaka camp ya muvimba samu na yina vwandaka kwisa Kadès-barnéa, kunwanisa Ndinga. Ntangu ba kumaka na Kadès-barnéa, kuna, camp kulembaka. Bawu vutukaka. Bawu kwendaka kaka na manima . . .



Beno bambuka moyo, bawu kudiaka madia ya bawanzio. Bawu vwandaka na Ndinga ya Nzambi, konso nkokila, yina me monisama. Mpe bawu diaka madya. Bawu kunwaka na ditadi. Bawu salaka nionso, bawu monaka bimangu. Bawu talaka Moise, mpe monaka ndinga ya yandi, monaka ba-profesi ya yandi, bima nionso.

Mpe kuna na nsuka ntangu bawu kuwaka mulongisi yayi ya luvunu, kwizaka na kati-kati ya bawu mpe longaka bawu mambu ya yimbi, yandi lembisaka camp, mpe tomaka na nzila ya yawu.

Yandi tungaka ntangu yankaka bivinga yina vwandaka na ntalu ya fuku mosi ya ba-dollars. Yandi tungaka ntangu yankaka ba-denomination ya nene. Yandi bwelaka ntangu yankaka mafunda na mafunda ya bantu, mpe yandi salaka mambu ya nene, mpe mambu ya ngolo, mpe yandi vwandaka profete. Ya kele mbote, kasi, kana ya kele ve na Ndinga ya Nzambi, beno ke sala mbote na kuvwanda ntama na yawu.

Nzambi ke sobaka ve mabanza na Yandi. Beno kangama kaka na Ndinga ya Yandi, samu ti yawu yina ke salama na nsuka, Ndinga, Ndinga na zulu ya Ndinga. “Muntu nionso yina ke katula Ndinga mosi na Yawu, to kubwela ndinga mosi na Yawu!” Ndinga yayi fwana vwanda, mutindu yina.

<sup>174</sup> Ntangu yayi beno kuwa mbote ntangu yayi. Ntangu kumekama ya Ndinga kwisaka, na ntangu bawu kwendaka kuna mpe monaka kutelemina vwandaka nene, kutelemina ya nene yina ba me monaka ntete ve, ba-Amalécite vwandaka—vwandaka bambala kumi yinda na bawu. Bawu tubaka, “Beto ke monana mutindu bampasu. Balupangu ya bawu, to bambanza ya bawu vwandaka ya kuziunga na bibaka ya nene ti ba lendaka kima mbangu na bapusu kuna, na bapusu zole, yina ke kima mbangu na ngolo nionso, na zulu ya bibaka, beno me mona, ya bambanza ya bawu. Beno tala, badionga ya bawu kele yinda mingi. Mpe bawu kele bantu ya nene. Na yina, beto ke monana mutindu bampasu. Beto lenda ve kusala yawu.”

Mpe bantu zole kangamaka na Ndinga yayi, Caleb mpe Josué, tubaka, “Vingila fioti! Beno kanga yinwa ya beno mafuku zole ya bantu na mwa ntangu fioti. Beto kele na kiyeka ya kusala yawu. Beno me mona, beto kele na kiyeka ya kulutila samu na kunwana na bawu.”

Yinki ba vwandaka kangama na yawu? Nzambi tubaka, “Mu me pesa beno yinsi. Ya kele ya beno.” Mpe bawu vwandaka kangama na yawu. Kasi bantu kwelanaka kuna, na kati ya bima yankaka, mpe ya vwandaka na ba-credo ya mutindu na mutindu mpe binkulu na kati ya bawu, mpe bawu lembaka mingi, madidi mingi, bawu vwandaka zaba ve wapi nzila kubaluka mpe yinki kusala. Ya kieleka. Kumekama ya Ndinga kwisaka kuna.

<sup>175</sup> Kasi, Yandi ke pesa beno muswa ya kusala, luzolo ya kusala, muswa, na kuzabaka ti. . . Yina kele na kati ya ntima ya beno, Yandi zaba yawu.

Beno ke tuba, “Mbote, Mpangi Branham, mu ke sala *yayi-mpe-yayi*. Ya ke yangisa munu ve. Nzambi ke sakumuna munu konso kilumbu. Mu ke yimbaka na Kimpeve. Mu ke binaka na Kimpeve. Mu. . .” Yandi ke pesa yawu muswa. Kwenda na ntuala. Ya kieleka. Kasi yinki beno ke sala?

<sup>176</sup> “Mu ke lwataka bakupe, mpe mu ke sala yayi. Ya ke yangisa munu ve. Mu zaba ti lukwikilu ya munu kele na kati ya Klisto, ya kele ve na yina mu ke lwataka.”

Kasi, Biblia ke tuba ti ya kele na kima mosi samu na yawu. Beno me mona? Yinki beno ke sala? Beno ke tula ditadi ya sakuba, mutindu Balaam salaka, na ntuala ya bakento nionso yankaka. Yinki beno ke sala na bantwenya ya beno ya bakento? Beno ke kuzwa nkonga ya ba-Ricketta, yina kele kaka kieleka, nkonga ya ba-Jézabel yayi me pakula. Beno me mona?

<sup>177</sup> Kasi Nzambi ke kwenda na ntuala. “Tala, Yandi me sakumuna munu.” Mu ke sala ntembe na yawu ve. Yandi sakumunaka Balaam, mpe. Beno me mona? Ya kieleka yandi ke sala yawu. Beno ke tambula na muswa ya Yandi, na luzolo ya Yandi ve ya kulunga. Nzambi ke sobaka ve dibanza ya Yandi, samu ti Yandi me sakumuna beno.

Yandi sakumunaka Israel kuna bamvula makumi yiya. Yinki bawu salaka? Bawu kwelaka bakento, kulisaka mabuta, yambaka bana, futaka mosi ya kumi ya bawu, zingaka mbote kuna. Mpe Nzambi sakumunaka bawu na ntoto ya kuyuma, disaka bawu na mana, mpe kukondwa nsuka. Bawu nionso kufwaka, samu bawu zitisaka ve luzolo ya Yandi ya kisina, muswa. . . Luzolo ya Yandi ya kisina, Ndinga ya Yandi. Bawu bakaka muswa ya Yandi.

<sup>178</sup> Kwenda na ntuala, kasi, beno bambuka moyo, ntangu bawu kwendaka na Kadès, bawu kwendaka ntama ve na nzietelo ya bawu. Bawu bandaka kaka na kubaluka kisika mosi, na ntoto ya kuyuma. Na yina, bawu zolaka kubasika kuna, na bilumbu zole na manima ya yina, bawu lendaka vwanda kuna na yinsi ya nsilulu. Bawu salaka nzietelo bamvula makumi yiya, mpe bawu nionso kufwaka kasi Josué na Caleb, bayina kangamaka na Ndinga ya kisina.

<sup>179</sup> O Nzambi, sadisa beto. Nzambi ke sobaka ve luzolo ya Yandi. Yandi ke sobaka ve dibanza ya Yandi, kasi Yandi ke sakumuna beno.

Kieleka, Yandi sakumunaka Balaam. Mpe yinki yandi salaka kuna? Yandi nataka nsambukila na camp ya muvimba. Beno me mona, beno fwana kangama na yina Yandi tubaka. Ata mbala mosi ve ti Yandi sobaka manaka ya Yandi ya kisina.

<sup>180</sup> Ntangu yayi beno tala Balaam bubu yayi, na kilanga, beno zola. Beno tala kaka na nziunga ya beno. Bawu ke kwenda na ntuala, ba ke tuba na bandinga ya malu-malu, ya kieleka, ba ke sadila dikabu ya Nzambi samu na kuzwa ndandu, mpe nionso, ya kieleka. Kasi ya ke tula mvindu na dibuundu ya muvimba ya Nzambi na malongi ya bawu ya kubeba. Ya kieleka.

Mosi tubaka na munu, yandi tubaka, “Samu na yinki nge ke sala *yayi*? Samu na yinki nge ke sala *yina*?”

Mu tubaka, “Nge ke kwikila ve ti Yina kele Kieleka?”

<sup>181</sup> “Oh, yinga. Kasi,” yandi tubaka, “nge zaba yinki? Yina kele ve ksalu ya nge. Nge ke sambila samu na bambevo. Ba ke kwikila ti nge kele profete. Na yina, nge lendaka longa na bakento yina wapi mutindu, mpe na babakala yina, wapi mutindu kusala *yayi*, *yina*, mpe *yankaka*.”

“Wapi mutindu beno lenda longa bawu algèbre kana bawu me longoka ve ABC ya bawu? Huh? Huh? Wapi mutindu beno lenda longa bawu bima yina kana ba ke ndima ve bima ya bawu ya fioti?” Beno me mona? Beno fwana vutuka na manima mpe kubanda kisika yina beno bandaka, to kisika beno telemaka, mpe beno baka Ndinga nionso ya Nzambi.

<sup>182</sup> Beno tala yawu kaka na bilanga ya ksalu bubu yayi. Mutindu Balaam kukwelaka na dibuundu ya Nzambi, kento ya kindumba, kwelaka kento ya kindumba na kati ya dibuundu ya Nzambi, mutindu mosi kele milongisi ya luvunu yayi bubu yayi yina ke na kumeka na kutuba na beno. Ba ke kotisa na nzila ya makwela ba-organisation yayi nionso mpe bantu yayi na kati ya kento ya kindumba ya ntama ya Apocalypse 17. Malongi ya bawu ya Balaam ke na kwenda bisika nyonso bubu yayi, mpe ke tuba, “Beto kele kaka mutindu mosi. Beto nyonso kele Baklisto.” Mpe banganga-Nzambi mpe ba-pape, mpe nionso yina, bawu nionso vwandaka kukakula mpe ke sala yayi.

<sup>183</sup> Mulongi tubaka... Ata ti mu me zaba mulongi ya Pentecotiste, bawu nionso, me banda ntangu yayi na kupesa dimpa koscher ya ronde. Yina zola kutuba, *Ashtoreth*, “nzambi-ngonda,” hostie kascher. Ba ke tuba, “Beno kanga meso mpe beno baka yawu, kana ya ke niongisa konsiansi ya beno.” Beno kanga meso? Hostie ya ronde, yinki ya zola tuba? Beto ke bakaka nzutu yina bukanaka, Yesu Klisto, yina bukanaka; ya kele ve nzambi-ngonda ya ronde, *Ashtoreth*, yina ba me yingisa na Marie. Mpe dimpa kascher ya ba-Romain ke vwandaka kaka ya ronde, samu na nzambi-ngonda, nzambi-kento, nzambi ve. Beto kele na kascher yina ba bukaka, kieleka. Oh!

<sup>184</sup> Na yina ntangu yayi kento ya nene ya kindumba ya Apocalypse 17, milongi ya Balaam yayi na malongi ya bawu ya luvunu, ba ke na kukotisa na nzila ya makwela dibuundu na mvindu ya mutindu yina. Beno tala mbote ntangu yawu ke kuma na kisika ya kumekama na nsuka, beno tala kulemba ya yawu

ntangu yayi. Bankama yivwa na ndambu ya ba-organisation ya kuswaswana, mosi vwandaka benda na lweka mosi, mpe mosi na lweka yankaka. Ya kele ve na kimvuka na kati-kati ya bawu. Mpe ba ke meka na kunata kimvuka; kukondwa yayi kusalama na nzila ya Ndinga ya Nzambi, manaka ya Nzambi ya kisina. Ba ke na kubaka yawu na nzila ya politiki mpe organisation.

Nzambi ke sobaka ve dibanza ya Yandi. Yandi ke kangamaka kaka na Ndinga ya Yandi. Yandi tubaka, “Mazulu na ntoto ke luta, kasi Ndinga ya Munu ke luta ve.” Ya kieleka. Yandi ke vwanda na Ndinga ya Yandi ya kisina. Oh, la la!

<sup>185</sup> Ata ti bawu ke banzaka kaka na zulu ya Yawu, kaka mutindu bawu salaka, mpe kaka . . . Ya kele kaka na kima mosi ya kusala. Yandi ke soba Yawu ve. Beno kwikila kaka. Samu ti, nyonso zole mazulu na ntoto ke luta; Ndinga ya Yandi ata mbala mosi ve ke kubwa. Beno me mona?

<sup>186</sup> Beno me mona kisika yina beno ke na kukotaka na makwela yayi? Beno me mona politiki mpe nionso yina, wapi mutindu bawu ke na kumeka kuvukisa dibuundu kintwadi na nzila ya politiki na kati ya dibuundu? Beto kele ve ya kuvukana na Klisto na nzila ya politiki.

Beto kele ya kuvukana na Dibuundu, na Klisto, na nzila ya mbotika ya Mpeve-Santu. Mpe mutindu beno zaba mbotika ya Mpeve-Santu, ya kele samu ti Mpeve yina na kati ya beno ke talisa ti konso Ndinga ya Nzambi kele Kieleka. Ya kieleka. “Samu muntu nionso yina ke katula Ndinga mosi na Yawu, to ke bwela ndinga mosi na Yawu, ba ke katula ndambu ya yandi na Buku ya Luzingu.”

<sup>187</sup> Kasi, “Yandi ke na kutoma,” beno ke tuba. Beno lendaka ve kukwikila Yawu na nzila ya kutoma. Beno lenda ve kuteza Nzambi na nzila ya bimvwama. Yinza ke na kukwenda na ntwala. Balaam vwandaka kwenda na ntwala na nzila ya yawu.

Kasi, mpangi-bakala, nge ke teza Nzambi na nzila ya Ndinga ya Yandi. Yandi ke zitisaka Ndinga ya Yandi mpe ke talisa Yawu mutindu Kieleka. Na yina, beno bambuka moyo, bankundi, ntangu nyonso yina beno ke zinga, beno zimbana yayi ata mbala mosi ve: Nzambi ke sobaka ve dibanza ya Yandi. Kasi, Yandi ke sakumuna. Yandi ke bika beno kwenda na muswa ya Yandi, kasi Yandi ke sobaka ve dibanza ya Yandi. Yandi ke sobaka ve manaka ya Yandi. Yandi ke soba ve Ndinga ya Yandi, samu na beno. Ve, tata.

Beno fwana kusoba. Beno lenda ve kufwanikisa Ndinga ya Nzambi na nzingulu ya beno; ya fwana vwanda nzingulu ya beno ke fwanana na Ndinga ya Nzambi. Beno me mona? Ya kele mutindu yina beno fwana . . .

Beno ke tuba, “Mbote, mu kele muntu ya mbote. Nzambi ke salaka *yayi*, *yina*, to *yankaka*.” Kasi beno ke zitisa Ndinga ya Yandi? “Oh, mbote, mu ke tuba na nge, ya kele ve . . . Ve.”

Mbote mingi, kima mosi ke tambula mbote ve kisika mosi kuna. Nzambi ke . . . Yinga, Yandi ke tomisa nge. Ya kieleka, Yandi ke sala ti nge . . .

<sup>188</sup> Ba-denomination ke na kukwenda mingi na ntuala! Bawu ke tunga batenta ya bawu, bayinzo-Nzambi ya nene, ya kitoko, mpe nionso yina, na yinsi ya muvimba. Ba kele bamvwama, mpe mbongo ke na kutiamuka, mpe bamambeke ke katuka bisika nionso. Biblia me tuba ve, “Ba me kuzwa na kati ya yandi bamvwama ya yinza, ata mpe mioyo ya bantu,” mpe bima nionso, yina ba me kuzwa na kati ya kento yayi ya ntama ya kindumba, yina kele mama ya diambu ya muvimba, politiki mpe organisation?

<sup>189</sup> Kasi mwa kimvuka ya fioti ya Nzambi kele Kento ya Yandi ya makwela, yina me kuzwa lufulu na zulu ya Ndinga. Bika ti Tata ya luzolo ya Mazulu kukeba beno na lusiamusu kuna. Beno kwenda ntama ata fioti ve na Ndinga yayi.

Beno lendaka kusakumuna, beno lendaka . . . Nzambi lendaka kubelula bambevo ya beno. Yandi lendaka kubelusa bébé ya beno. Yandi lendaka kubelusa bakala ya beno, kento ya beno. Yandi lenda belusa mama ya beno, muntu yankaka. Beno lenda dumuka na Mpeve ya Yandi, mpe kubina na zulu mpe na yisi.

Beno bambuka moyo, mvula ke nokaka na zulu ya muntu ya mbote mpe na muntu ya yimbi, kaka mutindu mosi. Kasi ntangu ba me tula nkuna yina kuna, ya me kubamaka to ya me kubamaka ve. Mpe kana ba me kubika yawu, ya lenda . . . Kana ya kele blé, ya fwana basisa mbuma ya blé. Kana ya kele Ndinga ya Nzambi, ya fwana basisa Ndinga ya Nzambi. Kana ya kele ve, mbote, na yina ya kele ve. Beno me mona? Beno me bakula yawu ntangu yayi?

<sup>190</sup> Mfumu sakumuna beno. Awa mu tubaka na beno ti mu ke sukisa na ngunga ya yivwa, mpe yawu yayi, baminuti makumi zole na mosi tii na kumi. Mingi na kati ya beno, ke kwenda ntama mingi. Mu zola beno. Mpe kikuma mu ke kangaka beno mutindu yayi, kele ve samu mu ke zola ve kuvwanda na nkú samu na beno, kasi mu ke zolaka beno. Mpe yina mu zaba, mu ke bumba kima mosi ve; mu ke tuba na beno Kieleka.

<sup>191</sup> Kuna na balukutakanu kisika mu ke kwendaka, beno me kuwaka munu ata fioti ve kulonga Bansangu yayi. Ve, mu silaka beno, na kukwisa na tabernacle yayi. Awa kele kisika yina mu ke longaka Bansangu ya munu. Mu ke diaka na tatu to yiya yankaka awa, yina Mfumu me pesa munu, mu ke na Masonuku na zulu ya yawu, ti mu ke mekaka na kulonga yawu ve kisika yankaka kasi kaka awa. Awa kele kisika Ndinga ya Nzambi basikaka. Mpe, tii Nzambi ke soba yawu, mu ke vwanda kaka awa mpe mu ke longa yawu kaka awa. Ya kele kieleka.

Kuna na balukutakanu, mu ke sambila samu na bambevo, mpe nionso yina mutindu yina; mpe, na nganda ya yina, mu ke tubaka bima na mutindu ya kubaluka, samu ti mameme kuwa yawu. Bawu zaba yina yawu kele. Kana ve, ya kele kaka pambu na ndobo, beno me mona. Mu ke talisa bidimbu yina—yina ke meka na kutalisa ti Nzambi me zaba, na kuswasikisa mabanza, mpe zaba bantima ya bantu, mpe ke sala mambu yayi. Yina kele dikabu ya kumwangisa nsangu, kaka samu na kuyangidika bantu.

Kima ya ntete beno zaba, bande manietiki ke kota na yinzo ya bawu. Na yina, yawu ke banda. Kana yandi kele dimeme, yandi ke kangama na yawu. Kana yandi kele nkombo, yandi ke losa bande na nganda. Uh-huh. [Mpangi Ben Bryant me tuba, “Mpe na nge, mpe.”—Mu.] Beno me mona, ya kele. . . “Mpe nge, diaka,” ya kieleka, Ben. Yina, ya kele kieleka. Ben me salaka nzingulu ya mutindu yina. Mbote mingi. Mbote, ya kieleka.

<sup>192</sup> Beno kele ve na kyese samu beno kele ya Yandi? Beno kele ve na kyese? Beto vwandaka yimbila mwa nkunga mosi ya ba-Pentecotiste, kubanda ntama, mutindu:

Mu ke na kiese ti Mfumu me basisa munu kuna;  
Mu ke na kiese ti Mfumu me basisa munu kuna;  
Kana Yesu kwisaka ve, wapi kisika mu zolaka  
vwanda?

Mu ke na kiese ti Mfumu basisaka munu kuna.

Oh, mu ke na kiese kubanda Mfumu basisaka  
munu kuna;

Mu ke na kiese kubanda Mfumu basisaka  
munu;

Kana Yesu kwisaka ve, wapi kisika mu zolaka  
vwanda?

Mu ke na kiese mingi kubanda Mfumu  
basisaka munu kuna.

Mu ke boka kubanda ntangu Mfumu basisaka  
munu;

Mu ke boka kubanda Mfumu basisaka munu;  
Kana ya vwandaka ve samu na Yesu, oh, wapi  
kisika mu zolaka vwanda?

Mu ke na kiese ti Mfumu basisaka munu.

Nkembo! Beno ke na kiese ve?

Beno kele ve na kyese. . .

Beto yimba yawu.

Beno kele ve na kyese ti Mfumu me basisa  
beno?

Beno kele ve na kyese ti Mfumu me basisa  
beno?

Kana ya vwandaka ve samu na Yesu, oh, wapi  
 kisika mu zolaka vwanda?  
 Mu ke na kiese ti Mfumu basisaka munu kuna.  
 Mbote, mu vwandaka kuyimba kubanda  
 Mfumu basisaka munu kuna;  
 Mu vwandaka kuyimba kubanda Mfumu  
 basisaka munu kuna;  
 Kana ya vwandaka ve samu na Yesu, oh, wapi  
 kisika mu zolaka vwanda?  
 Mu ke na kiese ti Mfumu basisaka munu kuna.

Beno kele ve na kyese ya yawu? Na yina *Beto ke Tambula Na Kati Ya Nsemo*. Beno zaba nkunga yina?

Beto ke tambula na kati ya Nsemo, Yawu kele  
 Nsemo ya kitoko mingi,  
 Beno kwiza kisika ke lezima kinoko ya kyadi;  
 Lezima na beto kilumbu mpe mpimpa,  
 Oh, Yesu, Nsemo ya yinza.

Beno zola yawu ve? Beto yimbila yawu diaka.

Beto ke tambula na kati ya Nsemo, Yawu kele  
 Nsemo ya kitoko mingi,  
 Beno kwiza kisika ke lezima kinoko ya kyadi;  
 Lezima na beto kilumbu mpe mpimpa,  
 Oh, Yesu, Nsemo ya yinza.

Ya kele kubasika ya mwini!

Beno nyonso basantu ya Nsemo beno tuba,  
 Yesu, Nsemo ya yinza;  
 Kieleka mpe kyadi na Nkumbu ya Yandi,  
 Yesu, Nsemo ya . . .

Ntangu yayi beto telemisa maboko ya beto na yina beto ke yimbila yawu.

Oh, beto ke tambula na kati ya Nsemo yayi, Ya  
 kele Nsemo mosi ya kitoko mingi,  
 Ya ke kwizaka kisika ke lezima kinoko ya  
 kyadi;  
 Lezima na beto kilumbu mpe mpimpa,  
 Yesu, Nsemo ya yinza.

Beno pesana mbote bamosi na bayankaka.

Oh, Yawu ke kwizaka kisika ke lezima kinoko  
 ya kyadi.

Beno kele ve na kyese ti beno kele bana ya Nsemo? Mwana me vumbuka.

. . . bisika nionso pene-pene ya beto kilumbu  
 mpe mpimpa,

“Bana ya fioti, beno zolana mosi na yankaka.”

Oh, beto ke tambula kaka na kati ya Nsemo,  
Yawu kele kitoko mingi. . . (Kumonisama ya  
Ndinga ya Yandi.)

Beno kwisa kisika ke lezima kinoko ya kyadi,  
Ya ke lezima pene-pene ya beto kilumbu mpe  
mpimpa,  
Ya kele Yesu, Nsemo ya Ndinga.

Beno nionso ke kwikila yawu?

Beto ke kwenda na Sion,  
Sion ya Kitoko, ya kitoko;  
Beto ke mata na Sion,  
Mbanza ya kitoko ya Nzambi.

Oh, beto ke mata na Sion,

Bawu kumanga na kuyimbila  
Bayina me zaba ve Nzambi ya beto;  
Kasi bana ya Ntinu ya Mazulu,  
Kasi bana ya Ntinu ya Mazulu,  
Mpe bawu ke samuna pwelele kiese ya bawu,  
Bawu ke samuna pwelele kiese ya bawu.

Na yina beto ke tambula. . . (Nkembo!)  
Sion ya kitoko, ya kitoko;  
Oh, beto ke mata na Sion,  
Mbanza ya kitoko ya Nzambi.

Oh, beto ke kwenda na Sion,  
Oh, Sion ya kitoko, ya kitoko;  
Beto ke mata na Sion,  
Mbanza ya kitoko ya Nzambi.

<sup>193</sup> Beno basisa muswale ya beno. Beno basisa bamuswale ya beno, na mwa ntangu fioti. Beto pesa Mfumu munkayulu yina ba me ningisa. Ya kele ve mbuma, kasi ba vwandaka baka bamuswale yina vwandaka simba nzutu ya Paul mpe bima, beno me mona.

Oh, beto ke kwenda na Sion,  
Oh, Sion ya kitoko, ya kitoko;  
Beto ke mata na Sion,  
Mbanza ya kitoko ya Nzambi.

Oh, beto ke kwenda na Sion,  
Oh, Sion ya kitoko, ya kitoko;  
Beto ke mata na Sion,  
Mbanza ya kitoko ya Nzambi.

<sup>194</sup> Amen! Oh, ya ke pesa beno ve nsatu ya mbote? Mu lendaka banza na basantu yina kuna, yina belamaka na kukota na kati ya cirque ya ba-romain kuna, bawu bandaka na kumata na mongo yina, beno zaba, ba vwandaka mata mwa nzila yina vwandaka nata na dibulu ya bankosi, na kutubaka:



Oh, beto ke kwenda na Sion,  
 Yesu yayi ya kitoko, ya kitoko;  
 Beto ke mata na Sion,  
 Mbanza ya kitoko ya Nzambi.

Bilanga ya Sion ke butaka  
 mafunda ya lembami ya busantu  
 Na ntwala beto sabuka Kiti ya kimfumu ya  
 Mazulu,  
 Na ntwala beto sabuka Kiti ya kimfumu ya  
 Mazulu,

To beto ke tambula babala-bala ya wolo,  
 To beto tambula babala-bala ya wolo.

Beto ke kwenda na Sion,  
 Ya kele Sion kitoko, ya kitoko;  
 Beto ke mata na Sion,  
 Mbanza ya kitoko ya Nzambi.

<sup>195</sup> Beno vutukila bandinga ya munu:

Mfumu Nzambi, mu ke vutukila nsilulu ya munu na Nge. Sukula munu na yimbi nionso. Sukula munu na ntembe nionso na Ndinga ya Nge. Bika mu, kubanda Paki yayi, kuvwanda kivangu ya malu-malu kati na Klisto Yesu. Bika mu nata, na kati ya ntima ya munu, Ndinga ya Nge. Bika Yawu kuvwanda Mwindana na makulu ya munu yina ke lezima na nzila ya munu. Kubanda ntangu yayi mu ke landa Nge. Na Nkumbu ya Yesu. Amen.

Beto ke kwenda na Sion,  
 Oh, Sion ya kitoko, ya kitoko;  
 Beto ke mata na Sion,  
 Mbanza ya kitoko ya Nzambi.

<sup>196</sup> Yina ke pesa beno nsatu ya mbote ve? Beto me sala nsilulu ya malu-malu, na kuzabaka ti na kati ya bantima ya beto beto me kindisama na lufwa, beto me kuma bantu ke zinga. Yina ke pesa beno nsatu ya mbote ve? Oh, la la! Mu zola beno, na zola yina ke kufwaka ve.

Beno kuwa. “Beno zolana mosi na yankaka. Samu beno lendaka ve kuyina mpangi ya beno, yina beno ke mona, mpe kutuba ti beno ke zolaka Nzambi, Yina beno me monaka ve.” Beno me mona? Na yina beno zolasana kaka mosi na yankaka.

Na yina, beno ke salasana mosi na yankaka, beno ke sadila Nzambi. Ya kieleka? “Yina beno ke sala na yina kele ya fioti mingi na kati ya bayina kele na ngolo ya nkindusulu na kati ya bawu, beno me sala yawu na Munu.”

“Wapi ntangu beto monaka Nge na nsatu? Wapi ntangu beto kwendaka kutala Nge na boloko? Wapi ntangu beto salaka bima yayi?”

“Yina beno salaka na bawu, beno salaka yawu na Munu.”

197 Ya kele mbote ve? Mu zola Yandi, beno ve?

198 Oh, ya kele na nkunga mosi diaka yina beto fwana kuyimba, kana beno kele diaka na mwa muniti. Oh, mbote, beto ke baka yawu. Mbote mingi. Mbote mingi, tata. Oh! *Baka Nkumbu Ya Yesu Na Nge*. Beno zimbana yawu ve, bankundi. Beto nionso kuyimba yawu ntangu yayi. Beto nionso, kintwadi ntangu yayi, kaka na ntima mosi ya nene, beto pesa yawu na Yandi. Beto kwenda, na nionso yina kele na kati ya beto.

Baka Nkumbu ya Yesu na nge,  
Nge mwana ya mawa mpe ya kiadi;  
Yawu ke pesaka nsayi,  
Baka Yawu bisika nionso nge ke kwenda.

Nkumbu ya kitoko, O Nkumbu ya mbote!  
Kivuvu ya ntoto mpe kyese ya Mazulu;  
Nkumbu ya kitoko, O Nkumbu ya mbote!  
Kivuvu ya ntoto mpe kyese ya Mazulu.

199 Beno bambuka moyo ntangu yayi, beno sambila samu na munu ntangu mipepe ya tiya ya lukwamusu ke bula, ntangu bampeve ya yimbi ke meka kutelemina balweka nyonso, mu ke bambuka moyo ti beno ke sambila samu na munu na mpimpa to kilumbu, mpe mu ke sambila samu na beno.

Beno simbisa pasteur ya beno ya mbote, Mpangi Neville, mpe nkundi ya kisalu, Mpangi Capps. Beno kuwa bawu. Ba ke longu beno Ndinga ya Luzingu. Mu ke kwikila yawu. Kana mu vwanaka kwikila yawu ve, kieleka mu zolaka ve kuvwanda na bawu awa. Kieleka mu zolaka ve kusala yawu. Mu ke kwikila ti ba ke kwikilaka Nsangu, mpe bawu ke kangama na yawu tii na mutindu ya luzabu ya bawu, mpe mu ke kwikilaka na babakala yayi zole. Beno vwanda na bawu. Bampangi yankaka yayi ya babakala, bisika nionso bawu kele na balukutakanu ya bawu kuna, yina me kwisa awa na nkokila yayi, kana beno kele pene-pene ya bawu, beno vwanda na bawu. Beno kuwaka yina ba me kwisila awa, na nkokila yayi.

Baka Nkumbu ya Yesu na nge,  
Mutindu Kinwaninu ya ngolo; (Beno kuwa yayi.)  
Ntangu bakumekama ke kwisila nge,  
Niunguta kaka Nkumbu yina ya Santu na kati ya kisambu.

Nkumbu ya kitoko, (Nkumbu ya Kitoko!) O nkumbu ya mbote! (O Nkumbu ya mbote!)  
Kivuvu ya . . .

Nzambi ya luzolo, belusa bantu yayi. Mu ke sambila Nge, Tata, na Nkumbu ya Yesu. Pesa yawu, Mfumu, mu ke sambila.

. . . O mutindu ya kele mbote!  
Kivuvu ya ntoto mpe kyese ya Mazulu.

Tii beto ke kutana! tii beto ke kutana!  
 Tii beto ke kutana na makulu ya Yesu;  
 Tii beto ke kutana! tii beto ke kutana!  
 Nzambi kuvwanda na beno tii beto ke kutana  
 diaka.


Beto kulumusa bayintu ya beto ntangu yayi.

[Mpangi Branham ke yimba na kati ya yinwa *Nzambi Kuvwanda Na Nge*—Mu.] O Nzambi, vwanda na beto. Sadisa beto, Mfumu.

...beto ke kutana na makulu ya Yesu! (Tii  
 kuna beto ke kutana!)  
 Tii beto ke kutana! tii beto ke kutana!  
 Nzambi kuvwanda na beno tii beto ke kutana  
 diaka.

<sup>200</sup> Ya kele kieleka kisambu ya munu. Tii kuna beto ke kutana diaka, Nzambi sakumuna beno! Mpe ntangu yayi mu ke lomba na Mpangi ya beto ya ntalu Neville kana yandi ke bika kimvuka yayi ya kitoko.

Nzambi ke zolaka beno, nionso. Mu ke vutula matondo mingi na kuzwa bantu mutindu beno nyonso. Yinki zolaka vwanda Nsangu ya munu kana mu kuzwaka muntu ve samu na kukwikila Yawu? Mpe ya kele na bantu awa, beno ke ndima kufwa samu na Yawu, samu na Nsangu yayi beto me kuzwa. Bika ti Nzambi kusadisa beno, mosi na mosi. Bisambu ya munu kele na beno. Balusakumunu ya munu ke tambula na mosi na mosi ya beno. Bika ti beno zimbana ve ti beno kele kitini ya mvumbukulu yayi. Ngolo ya nkindusulu kele ntangu yayi na kati ya beno. Nionso yimeni. Beno kele mwana ya Nzambi.

Beto kulumusa bayintu ya beto, na kuvungilaka ti Mpangi Neville kumanisa lukutakanu. Mpe Nzambi sakumuna beno. 

*NZAMBI KE SOBAKA DIBANZA YA YANDI*  
*SAMU NA NDINGA YA YANDI?* KNG65-0418E  
(Does God Ever Change His Mind About His Word?)

Nsangu yayi ya Mpangi William Marrion Branham, kulongamaka na Kingelesi, na Lumingu na nokila, na kilumbu ya 18 ya Ngonda ya yiya, na mvula 1965, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)